


國澤首義文牘

冊下



文

告





## 討袁逆檄

十萬火急各省上將軍巡按使護軍使鎮守使各都統並轉各軍師旅長各道尹各  
 知事各商會農會教育會各學校各報館公鑒嗚呼天禍中國實生妖孽袁氏以子  
 孫帝王之思致億兆生靈之禍怙終不反悔諫無親既自絕於國民義不同其履戴  
 敢聲其罪與衆討之袁氏昔在清廷久竊權位不學無術跋扈飛揚兇德既已彰聞  
 朝端爲之側目迨民軍首義之日及清廷遜位之時袁氏兩端首鼠百計媚狐以孤  
 兒寡婦爲大可欺以天災人言爲不足畏跡其侮弄神器睥睨君親固已路人知司  
 馬之心識者有沐猴之嘆惟時我邦人諸友念風雨之漂搖懼民生之塗炭永懷國  
 難力奠邦基故贛寧之役無功而皖粵之師亦挫乃袁氏恃其武力遽即驕盈蹂躪  
 人權弁髦法治國會加以解散自治橫被摧殘異己削迹於國中大權獨操於一手  
 彼固曰是可以有爲矣卒之無補時艱不保中立濟南自拓夫戰域遼東復展其租  
 期甚至俯首爲城下之盟被髮有陸沉之痛嗚呼我國民之忍辱含垢爲已甚矣袁  
 氏之力圖滿雪以求報稱宜何如者何圖異想忽開野心愈肆元首謀逆帝制自爲



籌安會發生於前。請願團繼起於後。等哀章之金匱。假疆華之赤符。對內國人民。則謂外議之一致。於外交方面。復假民意以相欺。自奮獨夫之私。欲掩天下之目。嗚呼。永除專制。夫已氏之口血未乾。難拂民心。前清帝之詔書。具在無信不立。寧得謂人食言而肥。何以爲國。因之外。自召警告。頻來干涉之形。既成保護之局。將定此時。楊再思一日。天子寧復有人間羞惡之心。他日石敬瑭半壁山河。詎更有吾民視息之所興言。及此哀痛。何云夫總統一國之元首。中外所具瞻也。今袁氏躬爲叛逆。自失元首之資格。斯其醜行涼德。固有無能爲諱者。更舉其略以告國人。南北和議。初成。黨人歡迎南下。袁氏欲留無辭。乃煽動兵變。以爲口實。京津一帶。慘付劫燒。張家口兵變。首亂不過數人。而全軍咸遭坑殺。逞一己之淫威。輕萬衆之生命。是爲不仁。黎副總統一代元勛。功在民國。段陸軍總長當世人傑。志尤忠純。皆袁氏股肱心膂也。徒以反對帝制之故。積被猜疑。瀛台等羑里之囚。西山有雲夢之辱。近傳惡耗。未卜存亡。歎烏喙之凶殘。悲烏弓之俱盡。是謂不義。梁士詒、段芝貴、張鎮芳、袁乃寬、楊度、胡瑛、顧鼈輩。皆市井小人。頑鈍無恥。袁氏利其奔走。任以鷹犬之材。梁等遂竊威



權肆其狼狽之技。羣邪並進。一指當前。望夷之禍。匪遙輪台之悔。何及。是謂不智。當和議初起。袁氏握清廷之權。每語人曰。吾誓不作總統。及叛跡已露。中外咸知。袁氏猶曰。公等若再以帝制相迫。則我必逃英倫。言猶在耳。今竟何如。是謂不信。辛壬之際。義旅同興。爭冒死以圖功。更舉國以相授。袁氏之有今日。伊誰之力。乃動矜謙讓。橫肆誅夷。謂不殺于謙。則此舉無名。謂苟無曹瞞。則幾人稱帝。功反爲罪。生者之身。已冤死而有知。地下之目。豈瞑。是謂不讓。又謂財權集於內府。計部徒建空名。大借款以鹽稅抵押。用途始終秘密。長蘆運鹽公司。獨占商利壟斷。聞亦同登。袁乃寬。梁士詒。張鎮芳。袁氏之聚斂臣也。交通銀行。袁氏之外府也。甚至一國之元首。而寄私產於他邦。騰笑外人。貽羞當世。其寡廉鮮恥。有如斯者。尤可異者。顯違親訓。陌視孔懷。乖戾已深。本實先撥。宮門喋血。患已伏於隱微。斗尺尋仇。禍恐烈於典午。彼宗且覆。吾國何存。哀我無告之人民。忍隨昏暴而俱盡哉。昔者董逃未唱。關東州郡同盟。莽竊初成。兩河義軍並起。今袁氏之罪。更浮於二兇。民國之危。尤甚於季漢。而且孫皓與下。多忌祖約。褊阨不仁。孟津之八百。不期牧野之三千。愈奮斯時也。各省軍民



會 澤 文 牘 下 卷

長官身爲共和官吏。實繫大局安危。必能揮士行之義。應標茂宏之大節。舉足輕重。立判存亡。其有海內。願尉先朝耆碩。在昔首陽。貶節原知。心在國家。於今大盜潛移。寧肯助其亂逆。諛同義憤。請共驅除。至若南陽舊部。新室故人。誰非國民。豈任私暱。况悲涼風於斛律。剗地難防。感大樹之飄零。長城已壞。難共憂患。請視韓彭。其必有倒戈以圖奮袂而起者乎。自餘各界人士。雖未與人軍師之謀。應念興亡有責之義。則匹夫蹈海。義感邦君。小吏登壇。節厲羣后。於古有之。是所望也。堯等痛念阽危。誠發宵寐。力雖窮於填海。志不挫於移山。請負弩以先驅。擊鼓桴之相應。將與摧公路之枯骨。走楊越之居尸。義聲播而黃河清。大旆指而幽雲捲。然後保固有之民國。定再定之舊邦。解此倒懸。綿我華胄。天下自此定矣。諸公其有意乎。乃若覬延漏刻。眷戀窮城。等防風之稽誅。效蜚塵之死紂。則師直爲壯。助順者天。何枯朽之能支。將身名之並裂。勿貽悔於他日。庶有感於斯文。

其二

維中華民國五年元月始旦。中華民國護國軍政府檄曰。蓋聞輔世之德。篤於忠貞。



會

澤

文

贈

下

卷

長民之風高於仁讓使梟聲雄夫野心狼子逞城狐之兇姿弄僭竊於高位則我皇  
王孝孫并世仁賢誼承先烈責護斯民哀恫鬱紆成茲憤疾大義敦敕誰能任之國  
賊袁世凱蠱質曲材賦性姦黠少年放僻失養正於童蒙早歲狂遊習雞鳴於燕市  
積其鳴吠之長遂入高門之寶合淝小李驚其譎智謂可任使稍加拂濯遂蒙茸澤  
起爲雄狐不意其浮夫近能淺人侈志味道惜學騁馳失軫遂使顛蹶東國覆公餗  
以招虎狼狡詐興戎缺金甌以羞諸夏適清廷昏昧致遁逃刑戮猶復包藏穢毒不  
知愧恥殫其暮夜之勞妄竊虎符之重黃金橫帶賣屏玉於權門黑水滔天引強敵  
以自重雖奸逆著明清廷已知猶潛伏戎羽隱持朝野降及辛亥皇漢之義如日中  
天浩氣颯飛噴薄宇宙風雲鷗沛集興武漢之師士馬精妍遠響東南之鼓造黃龍  
而會飲納五族於共和大勢全集指日可期天不佑華誕興賊子蠢彼滿室引狼自  
庇哀乃憑藉舊恩攀援時會僞作忠良牢籠將卒脅逼孤寡奪據朝權復僞和民聲  
迷奪時賢虛結鬼神信誓旦旦懦夫懼戎過情獎許維時南京渠帥實亦密達寡防  
墮奸計倒持太阿參此凶逆迨大邦旣集威勢益專遂承資跋扈肆行兇武則奔



虺。蠹。基。布。陰。謀。毒。害。勳。良。搖。惑。衆。志。造。作。威。福。淆。撼。國。基。背。法。畔。民。破。敗。綱。紀。癸。丑。  
 之。役。遂。有。討。伐。之。師。天。未。悔。禍。義。聲。失。震。曾。不。警。省。益。復。放。橫。驕。弄。權。威。脅。肩。廊。廟。  
 是。以。小。人。道。長。凶。德。彙。征。私。託。外。援。濫。賣。國。權。弑。害。民。會。私。更。法。制。縱。兵。市。朝。威。持。  
 衆。論。布。散。金。璧。誘。導。官。邪。冀。以。積。威。積。惡。之。餘。世。風。頹。靡。恥。滅。沒。之。後。得。遂。其。倒。  
 行。逆。施。僭。登。九。五。之。欲。故。四。載。以。還。天。無。常。經。國。無。常。法。民。無。定。心。官。無。定。制。丹。素。  
 不。終。朝。功。罪。不。盈。月。游。探。驕。兵。畦。毗。路。途。貪。官。污。吏。竄。亂。朝。野。以。至。庶。政。敗。弛。商。工。  
 凋。敝。猶。復。加。抽。房。畝。朝。夕。斂。征。假。辭。公。債。比。戶。勒索。淫。刑。慘。苛。民。怨。沸。騰。兇。饑。所。至。  
 道。路。以。目。此。真。世。道。陵。夷。之。秋。天。人。因。隱。之。會。四。凶。所。不。敢。爲。湯。武。所。不。能。宥。者。矣。  
 維。皇。漢。九。有。奠。安。東。陸。時。流。漂。盪。越。在。遼。迤。緬。維。祖。德。執。敢。忘。克。復。我。邦。家。義。取。自。  
 拯。故。辛。亥。之。役。化。私。爲。公。志。在。匡。時。道。惟。共。濟。衷。乃。睥。睨。神。器。妄。欲。盜。竊。內。比。姦。邪。  
 既。多。離。德。外。遂。屏。隕。甘。爲。犬。豚。是。以。四。郊。多。壘。弗。知。慙。悚。海。陸。空。虛。弗。思。整。訓。材。用。  
 匱。竭。弗。事。勸。來。健。雄。失。養。弗。興。學。藝。室。如。懸。磬。野。無。青。草。是。以。養。寇。外。蒙。削。國。萬。里。  
 失。馭。東。魯。屢。墮。嚴。疆。要。約。之。興。復。倉。皇。失。措。輿。璧。唯。命。遂。使。滿。蒙。多。離。散。之。民。青。徐。



有包羞之婦抗我封疆。堪我心腹皇皇大邦。苟爲侮戮日蹙百里媚茲一人此尤我。俠士雄夫所厲目切齒驚懼憂危而不可一朝居者也。夫天道健乾義惟精一在德。則剛制行爲純。故士不貳節女不貳行廉恥之失諡曰賤淫。四維不張國乃滅亡。自。戶族國家威灼五陸。雄風所扇政驚其公國競以羣。是以乾德精剛宜充。物里閭洋。溢衆庶旁魄沆漑蔚爲駿雄。故辛亥之役黜君崇民揚公尊國。所以高隆人格發揚。衆志義至精而理至順。故雖舊德老成去君不失忠。改官不降節。哀氏身奉先朝職。爲臣僕華山歸放。僅及四紀。載瞻陵闕猶宜肅恭。故主猶存天良安在顧藐。然以槽。櫪餘生不自揣量。妄欲以其君之不可者而自爲其可。是何異飾馬牛之骨揚溲勃。之灰以加臭乎。吾民以淫汗平當世而令我名公先德爲其賤淫白璧黃金。渣其瑕。穢此猶我元戎巨帥良將勁卒碩士偉人所同羞共憤深惡痛絕而不能曲爲之宥。者也。彙此種種袁氏之罪實既上通於天萬死不赦。軍府奉崇大義概念生民謹託。我黃祖威靈恭行天罰。輒宣茲義辭告我衆士。招我同德。今將歷數其罪我國民其。悉心以聽。夫國爲重器神嚴尊憚覆載所同建國之始義當就職南京明其所受哀。



會  
澤  
文  
版  
下  
卷

乃顧影自慚。妄懷畏懼。陰縱部兵。稱變京邑。用以要嚇國人。遷就受職。使國權出於遙。玩視國家之尊嚴。其罪一也。活佛稱異勢等。毛羽新國。既成。鼓我軋鏡。相機撻伐。累足之勞。瞬將威伏。袁乃瞻顧私權。妄懷疑忌。全國請討。置不聽從。遷延養敵。廢時失機。授他邦以蹈隙。縱刃之間。失主權於外力。糾紛之後。遂使蜿蜒巨嶂。棄此南金。萬里邊城。躍馬可入。貽宗邦後顧之殷。憂損五族雄飛之資。望其罪二也。政體更新。盪滌瑕穢。私門政習。首宜改遷。故內閣部首。須獲議院同意。所以樹公政之礎。明衆共之義。袁片病其嚴責。陰圖放佚。於第一次內閣聯翩去職之後。盡登婢寵。曠使軍警圍逼。議員索責。同意用以示威。國人開武力政治之漸。使民意機關失其自由。宣洩之用。其罪三也。國有大維。是曰法紀。信守不立。淪爲國亂。政亟行於焉。作俑故侵官敗法。爲世大詬。袁爲元首。尤宜凜遵。乃受事未幾。卽不依法定程序。濫用政府威權。誣殺建國勳人。張振武。使法律信用失其效能。國憲隨以動搖。政本因而銷鑠。其罪四也。國憲之立。系以三權共和之邦。主體在民。立法之府。誼尤尊顯。地方三級制實。虛冗建國除穢。亦旣罷黜。袁乃急欲市恩。妄復舊制。不俟公決。輒以令行使。



議院立法失其尊嚴國權行使因以紊亂其罪五也財政負擔直累民福外債侵逼尤傷國權議案成立特事嚴謹衆院皆可憲尤著明袁乃私立外約斷送鹽稅換借外貲二千五百萬鎊厲民害國不經衆院瞬息揮霍不事報聞蔑視通憲爲逆已甚其罪六也國有元首政俗式憑行係國華止爲民範袁乃知除異已不自愛重陰遣死士狙殺國黨領袖宋教仁以元首資格爲謀殺兇犯既辱國體且貽外譏國家威嚴因以掃地其罪七也共和之國建礎爲公民意所在亦曰聖神百爾職司義宜退聽國會初立人民望治袁恐政制嚴明不獲罔逞乃私撥國帑肥養爪牙收買議員籠絡政客用以陷辱國會迷奪衆情使議政要區化爲搗亂之場法案遷延藉作獨裁之柄其罪八也元首登選國有常經揖讓謳歌盛德固爾抑共和定疑國憲崇廢悉於是覘世法凜凜斯爲第一袁於臨時任滿正式更選之際鄙夫患失至兵圍國會因逼議員使強選總統以就已名致元首尊官成於劫奪共和大憲根本動搖國是益以危疑後進難乎爲繼其罪九也國民代表職司立法非還訴民意毋得斷闕衷於總統既獲復慮旁掣辜恩反噬遽爲臬鏡乃假託危詞羅織黨獄濫用行政權



私削議員資格用以醜殺國會併吞立法使建國約法由是推翻元首生身等於孽子其罪十也國家組織法系嚴明苟非選民焉事造法袁於戕殺國會之後妄以私意召集官僚開政治會議約法會議冒稱民意更改約法摹擬君主獨攬大權使民國政制蕩然無存濫汗新邦懸爲虛器其罪十一也民國肇造本以圖存時風所遷民強則興發揮羣能騰達衆志公私權利宜獲敬尊袁乃倒行逆施黜民崇吏既吞立法復盡滅各級地方議會密布游探誣扳黨獄良士俊民任意捕殺人民權利全失保障致羣黎股栗海內寒心毒吏得以橫行民業日以凋瘁民力壯盛有若捕風國勢頽隕益以卑下其罪十二也國局始奠海內虛耗財用竭蹶義宜根本整理袁乃專事虛緣日以借債政策利誘他邦爲私託外援之計斷送利權絕不顧惜遂鹿爭臭羣集廟朝遂妄以中北二部橫斷鐵道分許他人惹起國交之猜嫌增益宗邦之危難其罪十三也歐陸戰爭義宜嚴守中立及時奮進袁乃內驕外諛折衝無狀既反覆狼狽貽羞東魯復徘徊雌伏巽立要盟失滿蒙礦權至於九處承他邦意旨發布誓言辱國辱民傾海不滌其罪十四也民族虎爭領土強食外債毒國既若飲



鳩竭澤厲民何異自殺哀於歐戰既發外貨猝斷乃專事培克內爲惡稅房畝烟賭一再搜括復先後發行內國公債額逾萬萬按省配攤指額求盈小吏承旨比戶勒索等於罰鍰致富戶驚逃閭里嗟怨國民信愛斲喪無餘神州陸沉殷憂可畏其罪十五也生利致用民貴有恒縱博浪遊諡曰敗子盜賊充斥此爲厲階修政明刑首宜致謹哀乃縱谷粵吏復弛賭禁使南疆富庶之區負羣盜如毛之痛苛政猛虎同惡相濟清鄉勦殺無時或已政以福民今爲陷阱其罪十六也煙害流離久痼華族張皇人道僅維禁制奮厲闕絕猶懼不亟哀乃餽其厚獲倚以箕歛寵登劣吏設局專賣重播官烟飛揚淫毒失信害民辱國貽譏其罪十七也民權政治積流成海國家公有炳若日星世室舊家且凜茲盛誼汲汲改進華族務起方發皇古訓追蹤世法斷脰流血久而後得大義既伸迕則不忠喬木既登返則不智哀乃身爲豪奴叛國稱帝監謗飾非魚然求是狐假虎威因以反噬使凶德播流戾氣橫溢妖孽喪邦甘爲禍首其罪十八也易象系天筮曰无妄聖學傳經誼惟存誠故忠信篤敬保爲民彝衍爲世德哀乃機械變詐崇事怪詭貌爲恭謹潛包禍謀秘電飛詞轉輿衆口



會澤文牘下卷

塗芻引鹿指稱民意欺世盜名載鬼盈車背誓食言日月舛午使道德信義全爲廢  
詞民質國華盡量消失其罪十九也維我當世耆德草野名賢或手握兵符風雲在  
抱或權領方牧虎步龍驤或道繫鄉閭鶴鳴鳳翽理倫橫流若此起瞻國家悲  
憫何如凡屬衣冠之倫幸及斯文未喪等是邦家之主胡堪義憤填膺譙彼昏逆洵  
應髮指修我矛戟盍賦同仇書到都府勳耆便合衆興師郡邑子弟各整戎馬選爾  
車徒同我六師隨集義麾共扶社稷崑崙山下誰非黃帝子孫涿鹿原中會洗蚩尤  
兵甲軍府則總攝機宜折衝外內張皇國是爲茲要約日與全國民戮力擁護共和  
國體使帝制永不發生義一畫定中央地方權限圖各省民力之自由發展義二建  
設名實相副之立憲政治以適應世界大勢義三以誠意鞏固邦交增進國際團體  
上之資格義四建此四義奉以綱維普天率土罔或貳忒軍府則又爲軍中之約曰  
凡內外官吏粵若軍民受事公朝皆爲同德義師所指戮在一元惡旣除勿有所  
問其有黨惡朋姦甘爲逆羽殺無赦抗顏行殺無赦爲間諜殺無赦故違軍法殺無  
赦如律令布告天下迄於滿蒙回藏青海伊犁之域



通牒各國文

立國大地之上莫不以確守公道遵文明進化之軌庶人民得各盡其良能以維持人道爲應盡之天職故中外之交親治人與被治者之互相提携一以誠實忠信爲基礎慨自晚清失政紀綱紊亂我國民爰舉義師組織民國政府而袁世凱存覬覦總統之心佯爲附和當其受任之際固曾向中華國民及各友邦兩次宣誓矢忠民國謹守約法率履勿渝乃口血未乾而蔑誓違憲曾不旋踵然使專制之治不致危及邦家我國民固願忍受以觀後效而袁自就職總統四年於茲怙權恃勞作福作威以陰賊之方略箝制輿論以卑劣之手段誅鋤異己遂至方正不容於時奸邪接踵以起而袁又濫逞淫威以誘脅我全體人民使不得保其天良考其政績無非吸我民之膏血以求遂其一己之野心以致四海困窮無所控愬長此不變則中華民國將不復有所謂人道而袁氏之對於友邦則又惟以欺詐爲能事致令國家威信因而掃地內亂之起岌岌不免以爲我友邦憂而袁猶不悛蔑棄誓言羣小盈廷與之上下其手遂乃假託民意窺竊神器內罔我民外欺列國良士忠告充耳不聞多



方勸說卒歸無效我軍政府觀人道之滅絕見國運之將亡不禁惻然矜憫彼袁氏者既背口宣之誓言復廢創制之約法殃民禍國罪通於天我軍政府用是將帥三軍申討逆賊整兵肅甲誓誅元兇凡愛國之士無分南北不論文武利緩急進一致贊同以布義聲而張公道夫中華民國業經各友邦正式承認今軍政府既不得不執干戈以維持共和深望各友邦憫其境遇鑑其用心而贊其義舉茲特明白布告凡各條約於中華民國四年十二月雲南軍政府起義討逆以前訂立者概屬有效所有各友邦人民之生命財產商業在軍政府領域以內者本軍政府一律擔保並謹守條約義務自今以後所有國際往來即由本軍政府特派代表與各友邦公使領事直接交涉本軍政府更昭告天地自今伊始願遵守文明進化之原則以撫治此土俾克享共和國真正幸福而以忠信誠實爲外交方針庶幾邦交輯睦永無違言皇天后土實其聞之

照會各國公使文

爲照會事照得本國自一九一一年十月十號武昌倡義各省響應實因全國人民



久受君主專制之壓抑，乃奮起而爲政治革新。爾時承各友邦認爲交戰團體宣告中立，及南京臨時政府成立，改建民國，清帝退位，宣佈共和，均經通告各友邦。厥後正式國會成立，政府組織完備，又承各友邦陸續承認。本國人民曷勝感謝。不幸本國現任大總統袁世凱，謀叛民國，自爲帝制，拂全國進步之人心，逆世界文明之趨勢。自背受聯之誓言，不納友邦之勸告。本將軍巡按使爲尊重國憲，擁護共和，爰舉義師討國賊。願我最親之各友邦共守善意之中立，互敦永久之睦誼。相應照會。

計開

- 一 帝制問題發生以前，民國政府前清政府以前，與各國所訂結之條約，均繼續有效。賠款及借債，均仍舊擔認。
- 一 本將軍巡按使勢力範圍內，居留之各國人民，其生命財產，力任保護。
- 一 自帝制問題發生以後，袁世凱及其政府，與各國所訂之條約、契約及借款等項，民國概不承認。



一各國如有助袁政府以戰時禁制品者查出概行沒收。

一如各國官商人民有贊助袁政府爲妨害本將軍巡按使之行爲時即反對。

### 照會各國領事文

爲照會事竊以中華民國政體曾經世界友邦所公認近因總統袁世凱違反約法背棄誓言乘歐戰未終之時圖謀叛逆覬覦帝制迭承貴國駐京公使大臣一再勸告乃竟冒天下之大不韙悍然行之既爲各友邦所共棄復爲本國人民所不齒本將軍巡按使前受委任於中華民國政府祇知效忠勤於民國爰聯合各省宣告擁護共和繼續進行念我中華民國既蒙貴國政府承認於先此次本將軍巡按使爲捍衛國民維持國憲起見尤當爲貴國政府暨貴總正領事所贊同自應正式通告以重邦交所有本將軍巡按使對於貴國應繼續履行條款及求敦睦應行辦理各事相應開具條件備文照會貴總正領事查照並請轉達貴國政府暨貴國駐紮北京欽差公使大臣爲荷須至照會者

計開



一自宣告日起。所有前清政府及中華民國政府與各國締結之條約及關於滇越滇緬會訂各項單行章程均繼續有效。

一凡在本將軍巡按使勢力範圍以內之旅居各國官商教士遊歷人等。所有生命財產均按約切實保護。如有正常損失。由本將軍巡按使擔任賠償。惟私赴南夷荒僻及匪亂未靖地方所受損失。不在此限。

一請電告緬甸越南政府。轉飭沿邊文武。照舊與民國雲南省所派文武接洽商辦各事宜。互相維持兩國邊界治安。（照會德領不用此條）

一民國政府因歐戰事公佈之中立條規。在本將軍巡按使勢力範圍內。仍切實履行。

一以後如有國際重大事件。應由本將軍巡按使直接辦理。其他關於本省交涉事宜。仍請照常辦理。

### 佈告軍民起義情形文

爲通佈事。照得共和成立於茲四載。國是久定。中外具瞻。乃袁總統蔑棄約法。帝制



自爲假託民意搖動國本。自帝制問題發生以後。內則羣情惶惑。懼禍至之無日。外則五國警告。動干涉之危機。本都督眷念國本。慮漂搖之莫定。思消患於無形。當於民國四年十二月二十三日。電告袁氏。促其反省。不圖彼昏不悟。曾不見覆。窺其意旨。直不惜以全國爲孤注。以求遂其大欲。似此。選善路塞。遺臭心。甘本都督愛國厚恩。與叛賊不兩立。與民國共生死。又於民國四年十二月二十五日。通電各省。并宣布在案。此事係屬全國公憤。風聲所樹。遐邇雲從。現在各省通電。次第贊同。慷慨誓師。共鋤兇逆。滇省出師。中原師直。爲壯已操。破竹之券。侖策飲至之勳。至省內各地。維持秩序。部署已周。刀斗不聞。絃歌依舊。合行示諭。仰全省軍民諸色人等。知悉。須知袁賊叛國。稱帝。不爲國法所不容。而本省仁義執言。已爲中外所共諒。事順而易。危害全無。爾軍民諸色人等。幸各照常營生。自敦本計。不必輕信妄聽。以啓驚疑。而滋紛擾。本都督有厚望焉。其各懍遵。勿違。特示。

查禁謠言告示

袁逆叛國。自爲帝制。滇軍奮發。首先舉義。擁護共和。推倒袁氏。遠近雲從。聯絡一氣。



志士仁人莫不同意義聲所播人民歡慰近聞市井妄滋謬說張大逆謀袒庇國賊是何居心誠屬叵測此必奸細借此煽惑若任流傳妨害民國特飭兵警認真查緝一拿經獲立予正法有報告者獎賞酌發以保安寧以維秩序各宜凜之勿輕嘗試如屬良民必曉大義萬衆一心勿惑浮議永保共和同享樂利恐未週知特此示諭

訓誡第一梯團第一二支隊長文

爲訓飭遵照事照得此次興辦義師剷除帝制川省爲行軍必由之道是以派遣勁旅出川以伸大義惟是經行各地有應爲各該官長切實申明遵守者(一)主聯絡川省與雲南輔車相依利害相共其現住陸軍各官長多屬舊時僚友聲氣素通苟能設法聯合取一致之行動則不戰屈人斯爲上策此應申明者(二)不安殺曹武惠之征江南也城池垂下之日以不安戮一人與各將領共誓後世稱爲仁將岳武穆行軍要訣五言以仁爲首矧茲義舉志在掃除元慝重建共和凡屬人民均我同類萬不宜妄肆殺戮致蹈殘賊此應申明者(三)明紀律易曰師出以律自古用兵未有紀律不嚴而能成事者焚燒房屋搶擄財物姦淫子女此暴徒亂賊之行爲正我



軍人所應痛恨誅鋤者。義軍所向務以買賣從公。秋毫不犯爲職志。壺漿之迎可立而待也。此應申明者。三四整精神。常人辦一事。謀一業。猶必一往直前。堅決不撓。乃能克底於成。矧殺敵致果。觸處皆險。地衝鋒對壘。隨時皆危機。而可不整奮精神。爭先効命乎。韓信之破釜沉舟。卒破項楚。李光弼以短刀置靴中。赴敵卒破史思明。期於必死而反不死。正所謂精神之戰勝。不亞於勇力也。此應申明者。四至於和衷以共濟。勿以意見而致生離心。有勇必知方。勿以輕躁而稍違節制。皆應悉心注意。應變隨機。他日薄海肅清。共和重建。各該官長之勳績懋昭。斯即本都督之宿志無忝矣。仰各遵照。并轉飭知照。切切此飭。

佈告不承認袁政府發公債及中交兩行紙幣文

爲佈告事。竊惟募集公債。所以供國家正當之用途。設立銀行。所以求社會金融之活動。非爲箇人營私罔利之具也。袁世凱背叛民國。棄總統而稱皇帝。既失元首之資格。卽不應運用國家之機關。以爲騙民之計。業經本軍政府代表中華民國。聲罪致討。將來共和統一。政府成立。所有本軍政府起義以後。袁政府所發行之公債。以



及中國交通兩銀行所發出之紙幣所吸收之存款均認爲與袁世凱箇人之交涉行爲。本政府概不承認。當此權奸竊國罔民之術無所不至。恐我父老兄弟稍有不慎。誤投資財。受其欺賂。貽累至鉅。用特先行切實聲明。免貽後患。除照會各國公使外。特此佈告。咸與聞知。

照會請任護國軍籌餉總局會辦文

爲照會事。現以變出非常。元首叛國。食言背誓。引慝導姦。實人理所難容。國法所不赦。本都督爲維持世道。擁護共和。特編護國三軍。期與中原豪傑會剪。蚩尤重光。八表。惟首義區域。軍多用繁。負擔甚重。非厚集軍實。充足餉糈。不足收士飽馬騰。迅掃烽煙之效。因設立護國軍籌餉總局。以期源源接濟。用壯軍威。特請執事擔任護國軍籌餉總局會辦。庶運籌決策。遠同借箸。於留侯輸粟。轉金不數量沙。於道濟爲此備文。請煩查照施行。須至照會者。

照會請充護國軍美洲籌餉代表文

爲照會事。竊自宗國肇建共和。於茲四載。國基甫定。民志稍寧。詎意天降鞠凶。元首



謀逆。施利誘威迫之手段。逞盜竊神器之狡心。以二三宵小爲之爪牙。視全國同胞。有若虀醬。背誓食言。悍然不顧。列強干涉。退讓自甘。揆厥私衷。殆不惜犧牲四百兆人之生命財產。以爲帝王之代價。忍心害理。莫此爲甚。此誠志士仁人所爲憤激填膺。不能不出而維持國步者也。繼堯等爲宗國安危計。陳收野之甲。致討獨夫。揮魯陽之戈。願回皎日。現集滇中子弟。編爲護國三軍。聯絡湘粵川黔。誓師伐罪。刻已陸續出發。軍威所至。勢猶破竹。將與中原豪傑會剪蚩尤。重光八表。惟是首義區域。軍用繁多。負擔特重。非廣呼將伯。厚集餉糈。無以收士飽馬騰之效。素諳僑美諸同胞。高義干雲。熱心愛國。知危必救。有同捐乘之弦。高見義勇。爲肯讓輸財之卜。式聞茲義舉。定予維持。用特敦請先生充任護國軍美洲籌餉代表。竊盼登高呼應。慨投義金。集腋成裘。共襄義舉。他日橫磨十萬直度。滹沱組練三千克摧強敵。竟共和之全績。還樂利於民生。皆仁人之賜也。惟諸君實圖利之。爲此照會。

通飭招集閒散軍官文

爲飭遵事。照得立國有常勝之道。而經武者必興。社會無終棄之材。惟乘時者則駕。



蓋兵可百年不用不可一日不備士或負俗之累而轉以立功名故當內外承平之秋猶且選士儲材備一旦緩急之用况值茲外侮迭乘國勢積弱之際而顧聽有用之人材終於淪廢置諸散地乎聞鼓聲而思猛士拊髀肉而慨英雄此本將軍於整飭武備之時重念舊日袍澤之士也歷年以來凡曾在各軍隊充任中下級官長或因過撤銷差使或因故自請長假其中不乏可用之材長令賦閑殊覺可惜用特飭知各該師長等轉知此項人員有願投効者迅速按照表式填注履歷事由陳由該師旅團營長及各軍事機關長官本署各處課長限十日內詳保來署聽候定期查驗如果材質可取過差可原卽應分別酌予任用俾得及時自効其有賦閑日久學術荒疎者應令補習學術亦着聽候傳取入校授以相當教育以備異時補充之選夫求士原以爲國豈惟是藐躬眷眷之私苟聞風感而奮興當益勵羣衆桓桓之武爲此飭仰一體遵照辦理此飭

招考陸軍志願隊文

爲飭行遵辦事照得尙武爲當今之急務而兵事乃儒者之至精非可侈口率談必



會澤文贈下卷

須精意研討泰西各國注重軍國民教育幾於通國皆兵日本步武西制亦復嚴重訓練既稽其年齡復慎其體格講授有定科修學有定期考試有定程畢業之後乃能寄心膂之用收指臂之功其稱雄競盛罔不由此我國歷年以來內憂未靖外患紛乘苟非儲強武之人材何以維國基於鞏固邇者因日本要素事件發生各學校學生激於愛國熱忱稟請加授軍事教育志誠可嘉願僅於各科目中添授軍事一二項未免泛濫而不精仍屬空談而無補本將軍迭與各將領籌商應就中等各學校畢業生中招考合格者若干名編爲陸軍志願隊專科訓練庶期事半功倍實效可期嗚呼國家多難勿辜燕領投筆之雄心邊患方殷各奮馬革裹尸之壯志爲此飭該道尹即便轉飭各縣一體遵照出示俾衆週知仰即查照此飭

## 曉諭軍民勿得加害龍濟光家族文

爲出示曉諭事照得此次興師討逆純由保民大義愛國熱忱絕不存縣毫意見之私又安有暴戾恣睢之舉凡我邦人諸友無論服官南北皆訂同心卽或羈絆未能遽脫勢處獨夫權力之下亦莫不略迹原心忠言勸告冀其一朝改轍幡然來歸共



舉獨立之旗。贊我共和之績。至其族屬財產。現在滇省者。保全備至。調護維周。嚴戒  
侵凌。時加存問。陳伯之松柏不翦。親戚安居。徐元直老母健存。田廬無恙。昔人之牢  
籠。有如是者。今日之寬厚。迺復過之。此非特感情之篤。於維桑亦以見義師之澤。如  
時雨也。乃近聞外間謠傳。謂龍濟光諸人。族屬在滇者。業已被害等語。此必奸逆搆  
煽。欲阻諸人嚮順之心。或由遠地猜疑。未悉義軍寬大之德。似茲調語。本無足稽。特  
恐軍民或滋誤會。除已迭電嚴飭各地方官妥爲保護外。合行出示曉諭。凡屬諸人  
族屬。各宜安居營業。無庸妄自驚疑。其在軍民人等。尤宜各體本都督調護深衷。勿  
得稍加侵害。須知漢帝誅李陵之族。高澄戮侯氏之孥。凡此暴戾行爲。皆義軍所不  
尙。矧事殊往昔。國號共和。同胞皆在。篤愛之中。鄉社况屬至親之誼。同茲根本。忍事  
傷殘。箕豆之煎。實爲本都督所深恥也。其各知悉。凜遵勿違。特示。

佈告義軍在川湘粵均獲勝利文

爲出示曉諭事。照得此次本都督爲維持國體。普順輿情起見。因興舉義師。擁護共  
和。黔亦宣布獨立。同爲響應。合力出兵。分向川湘粵三路進發。現據各方面報告。均



稱順利。茲將各處先後來電開示於後。以安人心。(一)據劉梯團長雲峰自叙府電稱：本部抵昭，即督兩支隊兼程前進。一月十六日，一二兩支隊先後行抵滇川交界之新場地面。十七日晨，我軍在新場與敵軍接戰。節次進攻，敵軍當之輒潰。進至燕子坡，敵人憑山列陣。一支隊仰攻移時，敵不稍卻。旋命二支隊繞道許堰，突擊敵軍後路。敵軍不支，棄山逃遁。我軍乘勝追擊，勢如破竹。由黃拋耳鳳來場直至捧印村，俱被佔領。十八日晨，一二兩支隊由捧印村先後進攻。午後二時，一支隊抵橫江附近之黃果堡。查此地左右崇山，路徑崎嶇。敵人以機關槍大砲羅置兩山，意在包圍我軍。我軍一支隊突入山峽，敵軍槍砲左右注射，彈下如雨。我軍奮勇支撐，冒死爭山。預命二支隊乘夜出其不備，繞出右翼，以蹙敵後。由山後振臂一呼，衝至山頂。敵軍奔潰下山。我軍乘勢仰擊，遂獲全勝。左翼敵軍亦聞風驚潰。槍斃逆官三人，殺傷敵軍約百人，奪獲大砲一門，機關槍一架。一路追擊，直至橫江。敵始奪船奔北。十九日，我軍直搗安邊。查安邊地控金江，左右兩山對峙。敵人高據左山，阻絕江路。一支隊踞右山，以大砲牽制敵軍。雲峰當率二支隊繞道羅東，越金江襲攻山後。約下午三



點半鐘。敵人方隔江射擊。雲峰親率二支隊。蜂擁登山。直貫敵背。敵軍前後無路。困獸死鬪。我軍左右盪決。拚命力擊。戰至夜分。敵軍大潰。擊斃敵軍營長戴鴻智。殺傷敵兵。搶獲軍械無算。敵人自此一蹶。膽爲之落。駐叙敵軍。棄城遠遁。我軍遂於二十一日。佔領叙城。(一)准蔡總司令電開我軍第一梯團。攻克叙城後。守叙之助逆北軍伍旅。死傷星散。不能收集。詎駐防瀘州一帶之北兵。第十六混成旅馮逆。竟率所部。馳轉南溪。意圖犯叙。一月二十七日。進至李莊。我第一梯團迎頭痛擊。逆軍死力抵抗。相持三日。我軍直前突攻。逆軍不支。驚潰奔竄。死傷狼籍。一部由陸潰退。一部搶乘民船。順流而下。適值川軍第二師長劉存厚。於二月二日。在納溪舉義。聞馮旅下竄。當派劉支隊攔路截擊。行至江安之馬腿子地方。正值逆軍十餘船。當卽開槍轟擊。逆軍倉皇無措。高懸白旗。口稱願降。紛紛搶渡。計沉溺水。及死於槍彈者。凡數百人。現馮逆有意歸誠。劉師長已派隊進擊江安。我第二梯團進規瀘州。前鋒已抵納溪。(一)准護國軍四川總司令劉電開我軍協同貴軍。已於二月六日午前八時。攻克瀘州。人民安堵。各界歡迎。(一)准貴陽劉都督電開據東路司令王文華電稱。一月二



十五日湖南晃州逆軍被我軍擊退。二月二號該逆軍復以一混成團由沅州直上。其前衛仍據晃州。我軍於三號黎明進攻逆軍營長及偽嚮道官前鎮遠道尹林炳華拒城抵抗。激戰三小時。擊斃逆軍多人。奪獲槍枝子彈無數。該逆軍本隊已向沅州潰退。追擊二十餘里。現已實行佔領晃州。各等語。合行錄電曉諭。仰通省各縣地方人民一體周知。此示。

諭蜀中人民文

爲示諭事。照得袁氏謀逆。普天同憤。滇省恭行天伐。仗義興師。本出於救國救民。取道蜀中。勢非得已。但此次大軍所到。殊苦吾民。於心實有未安。又聞逆軍所過地方。姦淫殺戮。慘無人道。於心尤爲惻然。所幸師直爲壯。故義旂所向。連戰皆克。叙瀘等州。以次而下。雖曰軍力之強。勝足驗人心之大。同曲直之理。成敗所由分也。惟是仁義之師。不事殺伐。尙望去逆效順。及早響應。協力進行。袁氏能早一日伏誅。大局自早一日奠定。卽人民亦得早一日蘇息。與民更始。再造邦家。宏我漢京。庶企強盛。爲此示諭。各色人等知悉。今日用兵。實爲民請命。水深火熱。亟思拯救。同胞。彈雨槍林。



致使生靈塗炭。言念及此。哀痛欲泣。凡我蜀民。尙希共諒。切切特示。

批熊克武呈護國招討軍司令部組織成立文

呈悉。該司令雄才偉望。至深欽佩。此次奔走國事。一至川東。響應紛起。足見平日德威在人。故能頃刻之間。集合舊部。克奏膚功。悵望雲天。無任翹首。據稱已將護國招討軍司令部組織成立。殊堪欣慰。務望竭力經營。相機進取。川東全定。即可爲會師武漢之先聲。將來考績論功。允堪報最。不禁企望深之。并盼與護國第一軍聯絡進行。庶得羣策羣力。俾川事早日底定。至要至要。切切此批。

諭普格都土司暨紳士等文

爲諄切曉諭事。照得我大中華。自辛亥革命。改建共和。肇造民國。世界列邦。無不承認。漢土人民。同享幸福。乃袁世凱野心勃發。欲以一手掩盡天下之耳目。變國體爲君主。改總統爲皇帝。舉天下之公化爲一姓之私。古今萬國。寧有此情理耶。本都督歷督滇黔四年。於茲受民國之重託。掌封疆之重任。只知盡忠民國。保衛共和。斷不忍附和叛國逆賊。苟取富貴功名。是以興舉滇黔各省義師。聲罪致討。起義以來。除



先後贊同各省外義旗所向靡不克捷。湖南廣西以次響應。出川之兵亦連克叙府永寧納谿南溪江安隆昌榮昌合江富順等城。川南各屬望風送款。重慶鎮守使周駿已暗相接洽。第二師長劉存厚并已宣告獨立。協助義軍。四川全省不日平定。惟寧遠一隅以地瘠民貧未忍遽然加兵。方謂該處官民人等克明大勢。早日歸順。以免重煩大兵。不意偽漢軍統領楊起元迷戀一己之利祿。不顧生靈之荼炭。竟敢糾合逆軍。負隅抗拒。誠所謂螳臂之當車。燭火之爭耀也。本都督率仁義之師。盡弔代之責。精兵如虎。健將如龍。熊羆百千。貔貅十萬。本應立派雄兵。迅加剿滅。惟是頑抗者只楊逆一人。其餘漢土軍民類皆深明大義。扶助共和。豈能以少數之愚昧致玉石以俱焚。該土司紳等表率一方。本有功于民國。須知袁世凱背叛共和。已為天下公敵。偽統領楊起元甘心附逆。同為民國罪人。順逆之理。曲直之分。優劣之勢。向背之情。宜已昭然共見。合再剴切曉諭。仰該土司紳速即召集所部兵丁。嚴為準備。一面攻擊楊逆。偽部以作前驅。一面相機進取。若能自樹一幟。克建奇勳。或響應義軍。協力贊助。或斬將擄旗。擄獲鎗砲者。皆立予重賞。並優加擢用。以酬其助勞。本都督現已派遣



委員分赴各地招安連合並調齊義軍尅日向川前進該<sub>士司紳</sub>等務須及早決計尅期進行勿爲楊逆所愚致陷爲叛民逆黨而不悟大軍一至徒貽後悔也勉之切切此諭

通告桂省軍將文

南甯陸上將軍陳師長龍州譚鎮守使桂林師旅長並轉各旅團營連長各道尹各商會農會教育會各報館公鑒袁氏叛國自絕於天本都督順宇內之推心乃奉詞而討罪出師以來所向克捷一麾而兩川底定再接再則三湘澄清順逆之勢旣分成敗之數已定猥茲龍逆濟光親光兄弟竊據粵東猶思岨負本都督旣以愛國愛鄉之義爲同聲同氣之求何圖彼昏曾不覺悟乃復奮其螳臂將肆螻爭龔假道於虞之詭謀逞以鄰爲壑之狡計本都督是用整我師旅將以樓船十萬驅呂相於海隅勁弩三千射劉鋹於嶺表惟是義旅之起專在屠龍而師行所經首出桂境陸將軍效忠民國海內著聞早寄同心必能相諒各師旅團營長同爲民國之干城亦當與義軍相提挈如其軍中左袒立成安劉之奇勛否則壁上縱觀亦是亡秦之豪傑本都



督已申。儆有衆。視等同袍。請無詐虞。敢誓天日。自餘各界人民。當知我軍。惟在誅。所有地方秩序。必能盡力維持。當胡越在同舟之時。况滇桂有輔車之誼。務各安其事業。絕不損其一毫。慎勿妄起猜疑。自滋紛擾。嗚呼。大盜移國。本率土之同仇。廉來逢惡。亦神人所共憤。試望桂林山水。此中。大有人乎。爲謝金田遺民。於今。可以興矣。

佈告勦撫臨蒙箇土匪文

爲出示曉諭事。照得。疊據探報。臨安、箇舊、蒙自、等處。有匪人受龍逆濟光賄使。潛謀作亂。經卽分飭嚴防。惟因此等匪人。皆係滇省土著。以爲具有天良。不過一時爲利所誘。不忍遽然加誅。冀其知過自新。翻然悔悟。乃昨據蒙自劉師長。臨安李旅長。及箇舊張知事。臨安王知事。報告該匪等。竟敢聚集黨徒。於初九夜。分撲臨蒙箇舊。當被劉師長督兵。立將蒙匪擊散。臨箇亦嚴行抵擊。經於初十、十一、十二等日。派遣重兵。由火車星馳援勦。并以匪衆既多。其中良莠不齊。添派招撫員黃鳳祥等二十餘員。馳往分頭招撫。其頑抗不服者。仍予痛勦。期於勦撫兼施。迅行殄滅。此等匪類。志在劫掠財物。遂昧于順逆之理。難保不假借種種名目。希圖裹脅。其實小醜跳梁。不



會

難尅日悉數芟除。特恐民間謠傳失實。致滋疑慮。爲此曉諭軍民人等一體周知。各安生業。勿得自相驚擾。是爲至要。特此通諭知之。特示。

招撫逢春嶺逆匪文

澤

文

爲出示招撫事。照得滇軍擁護共和。奉辭伐罪。大義昭于天壤。各省聞風。次第響應。矧隸滇籍者。宜如何同心一致。共保鄉邦。安有忍操同室之戈。而肇閱牆之衅者乎。不意逢春嶺等處逆匪。受人指使。爲虎作倀。始作亂於臨箇之間。繼竄擾於邱彌各屬。雖迭經官軍掃盪。然已成徧地瘡痍。編民無俄頃之寧。一夕數徙。比邑有流亡之嘆。十室九空。聽中澤之嗷鴻。瞻四郊之多壘。誰實首禍。致此騷然。該匪等身爲滇人。忍於害滇。豈絕無梓桑觀念。胡竟同箕豆相煎。返諸平旦之良知。試問何顏於父老。且該匪之敢於逞其兇鋒者。恃有人在粵。爲之援濟耳。現龍氏弟兄業經宣佈獨立。贊同義舉。該匪等懸軍遠地。孤立無援。設仍據險相持。執迷不悟。虎負隅而自固。螳奮臂以當車。何能禁大軍之雷擊。霆驅風馳。電掃其必殲於崇朝。殄無遺類。可斷言也。本都督深憫愚頑。務存矜恕。該匪等如果去逆效順。繳械投誠。本都督定當宥其

卷

下

牘



前愆策以後效相與効忠民國戮力中原垂史策之光榮壯河山之正氣較之甘心從逆爲暴鄉邦者孰得孰失該匪等其自決之爲此出示佈諭各宜知悉切切特示

曉諭紳民勿勾留逢春嶺逆匪文

爲出示慰諭事照得此次逆匪攻陷箇邑分擾臨蒙以至通海邱北彌勒等屬無不被其蹂躪雖經官軍勦辦次第救平然已時閱連旬禍延數邑民居殘毀邨衆凋零澤有鴻嗷之聲人無鳩集之所此固由該逆匪等豺狼成性安忍無親肆骨肉之摧殘乏梓桑之觀念亦由本都督先事未能豫計德化不足感人致此瘡痍苦吾氓庶誦小雅矜人之什覽鄭俠流民之圖盡焉心傷至輟寢饋除飭所在地方官吏分別妥爲撫卹外合行出示慰諭爾等人民須知各該地方經官軍迭次掃盪防衛加嚴該匪等決不敢再肆鳴張其有乘機逃竄形迹可疑者爾紳民人等亦應嚴加驅逐勿得私自窩留或潛行勾結有淆秩序致干嚴懲爾等其各安居樂業勿滋疑擾勤闢市之貿遷守田廬之耕作於以培復元氣樂利羣生各還含哺鼓腹之天漸臻穀擊肩摩之盛本都督有厚望焉切切特示



諭誠負傷軍士文

會澤文牘下卷  
爲諭遵事。照得此次出征川湘。暨本省勦匪。負傷各官長軍士。經本都督飭送各醫院。妥爲醫調。親加慰問。省垣各界。亦復開會歡迎。頗極優待。在各界傾服義勇。是以備極優崇。而該官兵等。身受殊榮。益宜深自刻勵。乃近日訪聞。該官長軍士等。不自歛抑。轉覺驕矜。或以小故而輒起忿爭。或藉微嫌而恣其要挾。種種不良。殊乖風紀。夫爲國宣力。軍人天職。即使疆場致命。馬革裹屍。亦分內事。况人方待我以優禮。我宜益示以謙冲。乃不失軍人高上之資格。若遂任性驕蹇。滋人非議。甚非本都督期望於各官兵等之初心也。爲此諭知各該軍士等。知悉。務各束身自愛。靜加調攝。以期早日就痊。出而効用。勿得滋事。妄爲致干軍紀。有負厚望。其各凜遵。切切此諭。

委派滇川各軍慰勞員文

爲飭委事。查此次興舉義師。掃除兇逆。造端宏大。艱鉅同膺。而諸將校士卒。陷銳摧堅。戰勝攻取。尤爲勞瘁。本都督身居帷幄。神馳疆場。食息寢興。不忘與子同仇之義。羔羊牛酒。爰修古人餉士之儀。茲特派某某爲某方面川滇軍慰勞員。仰即將各慰



勞品會商兵站部從速起運某某等處分致各軍轉發承領微物將意慰彼征人懋賞酬庸俟諸異日并即宣布此意是爲至要此飭

就撫軍長職職諭軍民文

爲出示曉諭事照得獨立各省爲統一起見組織軍務院并推舉本都督爲撫軍長岑春煊爲撫軍副長梁啓超爲政務委員長地點暫在廣東業於本月九日將宣言各書次第宣佈在案本都督迭辭不獲勉爲承任惟現在滇省護國各軍正在進行本都督居中調度一時斷難離滇所有軍務院事暫由撫軍副長代行代折本都督遙領職務亦殊無赴院之必要迺近聞外間紛紛謠傳謂本都督行將赴粵以致議論歧出殊礙聽聞除將設立軍務院前後各文電另行印佈俾衆週知外特此明白曉諭仰軍民人等一體知照勿得輕聽謠言致滋疑擾切切特示

設立軍務院通飭知照文

爲通飭知照事自滇省舉義擁護共和黔桂廣東相繼而起其餘如浙江陝西黑龍江湖南湖北等省均以次宣佈獨立惟袁逆尙未退位大局尙未解決所有各省一



會 切軍事財政外交等項不能不設置統一機關以資統攝而策進行前經公議擬設一軍務院并擬定軍務院組織條例院設撫軍長以爲代表餘設撫軍若干員并附

澤 設委員會代表會以爲辦事議事之機關先由滇黔桂粵四省發起其餘獨立各省以次加入現已於五月九號在廣東正式宣布成立并經互選舉定本都督爲撫軍

文 長岑春煊爲撫軍副長梁啓超爲政務委員長本都督自維德薄能鮮一再力辭未獲允許不得已業經正式就職其軍務院地點權設廣東肇慶本都督一時未能到

牘 院所有院事暫由岑副長代爲行折所有設置軍務院前後情形除分行外合亟飭仰一體知照各項公電各項宣言書布告公文程式組織條例一併附發此飭

### 佈告定期慶祝黎大總統文

下 爲出示曉諭事照得袁逆自上年十二月十三日下令承認帝制即已喪失元首資格祇以義師初興百務倥偬未遑推定繼任總統現滇黔桂粵先後獨立浙川湘蘇  
卷 贛魯汴閩等省亦相繼而起大局不日奠定當以滇黔桂粵四省名義於四月十八日宣言依照約法恭戴黎副總統元洪爲中華民國大總統併通告中外在案茲特



定期於本月初九初十十一等日。舉行慶祝。合行出示曉諭。一體知照。此示。

訓誠僚屬文

照得束身。乃能馭衆。崇儉。所以養廉。自昔在官。咸服斯訓。矧值邦基未固。國步多艱。凡我寅僚。丁茲時會。應如何臥薪嘗胆。待旦枕戈。爲未雨之綢繆。作履霜之戒懼。殊邇來考察滇中軍政各界人員。其深明此義。勤慎自勵者。固不乏人。而不知振作。頹靡自放者。亦復不少。往往飲食徵逐。聲色沉酣。效信陵君之醇酒。自荒等牧猪奴之樽蒲。相聚踰閑。在所弗顧。犯律亦不之恤。蕩檢違條。統兵者似茲。縱恣何以攝服士心。服政者任意恬嬉。必且曠其職務。又况風從俗靡。相率效尤。庶務之叢。胥日滋人。心之貽害匪淺。此誠可爲痛心疾首者也。本督軍綜治軍民。情殷共濟。旣以自勗。尤冀交修。自是以後。其各洗除積習。敦尚廉隅。戒逸就勤。去浮崇實。至于烟賭兩端。法禁綦嚴。尤宜戒絕。清明之躬。弗中以暮氣。節儉之美。弗奪以奢淫。士行之運。暨習勤。楊綰之清操。鎮俗此本。督軍所切望于我寅僚者也。倘或誨諄聽藐。弗能易轍改絃。定當執法以繩。勿謂言之不預。爲此令該○轉飭所屬。一體遵照。切切此令。



書

續



致北方各師旅團營

逕啓者。繼堯服務民國。歷時四稔矣。平昔對於袁氏。極端擁護。其所以擁護袁氏者。實擁護民國。蓋以國家當此千鈞一髮。禍至無日之時。豈可輕於發難。貽外人心。以口實。陷國命於危險。故不惜竭股肱。戮力圖治者。非有私於袁氏一人也。爲國爲民。應盡之天職。宜爾也。顧袁氏自受職總統以來。專橫暴虐。蹂躪法律。獎勵貪詐。摧殘善良。凡百施爲。未愜衆望。加稅以重累吾民。定約則喪失權利。對內無政治之可言。對外無邦交之足信。種種失敗。罄竹難書。循是不變。國將日蹙。而吾人猶隱忍以顧全大局。不肯急於攻擊者。以吾國共和初建。風雨飄搖。大難屢遭。瘡痍可念。苟可徐圖補救。不妨稍緩須臾。乃袁氏不自返省。近復造作民意。袁氏造作民意各電刻已由本省將原文印成一冊。佈告中外。帝制自私。既違國憲。又召外侮。外之恐將加入協約之戰局。內之尤無以對遜位之清帝。以若所爲。殆欲以四萬萬人民爲犧牲。五千年古國爲孤注。薄海人民痛心疾首。淪亡之禍。將在目前。繼堯託庇民國。激於天良之難昧。迫於大義之所在。不得已始爲民請命。乃率吾滇子弟。仗義出師。耿耿愚忱。當蒙鑒察。然茲尙有未盡



會 澤 文 閣 下 卷

之意不能不貢陳於諸君之前者。諸君軍人也。軍人責任救國。爲先國亡不救。責任何在。况其所服之官。係國民之委託。所食之祿。係國民之脂膏。乎。服民國之官。食民國之祿。當爲民國效力。始無忝軍人之職分。若服民國之官。食民國之祿。不爲民國盡責務。甘爲獨夫效鷹犬。今日受兆民之責備。異日爲史冊所貽譏。匪惟不忠。抑亦不智。且爲諸君計。即使忠於袁氏。亦不過希圖目前之富貴已耳。然袁氏爲人。雄猜很鷲。以黎副總統段芝泉馮華甫之效忠。今竟何如者。如竟眷戀私情。不忍舍去。微論袁氏爲天下公敵。師直爲壯。勝敗昭然。即能久於相持。亦徒重生靈塗炭之殃。而貽列強漁人之利。矧忠於一人。與忠於一國。其得失順逆。直不可以尋尺計乎。抑又聞之燕趙素多豪傑之士。荆軻謀刺秦政。田橫不臣漢王。義俠之名。古今稱羨。比者義聲所播。黔蜀向風。諸君均民國干城。見義勇爲。當能同伸天討。倘協力贊助。俾袁氏無能爲力。大局早日奠定。則再造民國之功。舍諸君其誰與歸。爲公爲私。時不可失。諸君明達。幸熟策之。



夫魯仲連東海之一匹夫耳。迺能力拒強秦，取銷帝號，伸大義於天下，增歷史之光。榮華盛頓，北美之一軍人耳。迺亦具獨立不羈之精神，爭天賦人權之公理，脫離壓制，建樹共和。茲二人者，其耳目口鼻，身體髮膚，無以異於人也。而思想高尚，義勇兼全。如是試一繙太史公之史記，遊合衆國之都城，卓卓名言，巍巍銅像，不禁令吾人歎美傾服，歆慕不置。今吾輩亦猶是挺然丈夫之身，而乃佻佻倪倪，致令袁氏一人施愚民之政策，逞獨夫之暴行，自爲帝制，賣國求榮。若竟遂其所爲，直將陷我四萬萬同胞於永世不復之浩劫。此繼堯等所以沉舟破釜，泣血椎心，不辭鐵血之勞，而謀公共之安者也。與自清廷遜位，革命成功，袁世凱以梟雄之姿，謬竊時譽。爾時在事同人，開誠布公，不忍生靈之荼炭，遂因而推舉之。以爲袁世凱果能維持國家之治安，尙不失爲當代之豪傑。乃袁氏自就職總統以來，包藏野心，妄貪帝位，試回溯其四年之種種施設，何嘗有一實心實政，惠及吾民者。無非爲其稱帝稱尊之私計而已。今試揭其奸罪，爲諸君子一略陳之。比年盜賊不靖，萑苻遍野，水旱災害環起，疊生國困民窮，已臻極度。仁人君子聞之，惻然矧其爲一國之元首，宜如何恐懼修



省力謀奠安生民。迺醉心帝位，岌岌不遑日事。敲剝供其浪費，牢籠要結無所不至。民生國計，概未有聞。但肆一己之奸貪，遑恤兆民之困苦。豈非不仁之甚者。世界文明日趨共和，四海之富九五之尊，已成陳迹。榮威久殺，况總統公舉爲世界無上之光榮。皇帝私傳，易啓骨肉殘殺之慘禍。分藩構黨，宮禁橫尸。歷史昭然，可爲殷鑒。袁氏諸子競長，爭雄各懷異心。豆釜之前，伏於眉睫。而乃利令智昏，一切不顧。但求償其大欲，略不慮及將來。猶靦然飾詞以告於人曰：余不惜犧牲一家，以爲國。夫今日之民國，固尙相安無事。也有何不得已而必欲犧牲其一家。始可相救者。其一家之閱牆猶末也。而全國之禍害隨之。其身甘爲石敬瑭、張邦昌、貽中國以莫大之恥辱。猶後也。陷全國人於奴隸牛馬與獨夫。以俱盡。豈非不智之尤者。袁氏兩次就職總統，皆宣誓言擁護共和，永不使君主復見。又其致各省都督書有云：世凱束髮受書，即慕唐虞官天下之風。以爲歷代治道之隆，罔不繫乎公私之兩念。泊乎中歲，默識外情，目覩法美共和之良規。以爲深合天下爲公之訓。云云。迺息壤在彼，竟不惜食言而肥。豈非不信之尤者。袁氏臣事清朝，世承恩澤。外掌封圻，內歷樞要。革命事



起。遂復倒戈。民國推任總統。然猶曰民國之元首。公僕而已。代表國家而已。既非易姓。而帝即無篡奪之嫌。今則欺人孤兒寡婦。公然取而代之矣。公然降封爲王矣。自古莽操之徒。猶未必喪心至是也。豈非不義之尤者。天下斷未有不仁不智不義不信。而可以忝然爲民上保邦家者。凡有血氣。宜無不痛心疾首。奮袂而興。咸思除此叛逆。還我共和。矧燕趙古稱多慷慨悲歌之士。北方強矯爲英豪義士。所挺生時至。今日豈竟無思想之高。義勇之備。如魯仲連。畢盛頓其人者乎。奈何倡義之舉。寂然無聞。北顧山河。猶蒙瘴霧。諸君子皆手創共和之人。其剷除貪橫之政府。保護神聖之民國。皆其固有之天職。未可放棄者也。誰具桎梏。阻其進行。致使地靈人傑之區。爲腥穢迷漫之地。英雄在望。用武無人。詎不大可惜哉。繼堯等之素志。本以國家爲前提。在平日服從命令。擁護中央。亦與諸君子同其宗旨。但袁氏既甘心叛國。則已爲天下公敵。繼堯等負民國之重託。受民國之祿位。斷不敢附和逆謀。以私害公用。是躬率仁義之師。誓盡弔伐之責。師直爲壯。衆志成城。行將會兵武漢。直搗幽燕。我北方諸同胞君子。見義勇爲。當仁豈讓。所望深體熱忱。共勳義舉。迅奏膚功。救民水



火蓋以正勝邪。以直勝曲。自然之驗。必至之符也。切勿存心觀望。坐失事機。甘作公衆之敵。自貽後至之羞。萬世千秋。永爲共和民國所詬病。則幸甚矣。臨頌不勝盼切之至。

## 致南洋各埠華僑

敬啓者。變出非常。元首背叛。國本漂搖。政情險惡。以利誘威。迫陽推暗。就之手段。爲惑世誣民。盜竊神器之僞辭。道德淪喪。信義銷亡。政本既傾。何以爲治。內治已圯。何以禦外。何以衛民。况以堂堂元首。躬爲叛逆。既背誓以食言。復導姦而引慝。實人理所難容。國法所不赦。繼堯爲宗。國安危計。爲世道人心。計諷訪仁賢。躊躇再四。非擁護共和。不足以奠安國基。非興師討伐。不足以驅除元惡。用特揮劍前行。率滇中子弟。編護國兩軍。期與中原豪傑。會剪蚩尤。重光八表。唯首義區域。軍多用繁。負擔特重。非厚集軍實。充足餉糈。不足收士飽馬騰。迅掃烽烟之效。素審僑南同胞。義氣干雲。渴慕新治。撫躬弔影。願爲強國之民。輸粟轉金。還作中邦之俠。循辛亥之偉迹。竟共和之全功。聞茲義舉。諒有同歡。愛國風高。敢呼將伯。茲已請柏先生烈武。任南洋



籌餉總代表呂君天民龔君振洲趙君厚生方君聲濤李君心雨金君仲顯任南洋  
籌餉代表分道南來甚願共扶危局慨集義金俾士氣飛揚免爲狼顧則橫磨十萬  
直渡滹沱躍馬燕山生擒元濟他日政象清明河山增色猗維諸君實利賴之端此  
函告并頌公祺

致日本美洲香港印度等處華僑

逕啓者宗國肇建共和於茲四載國基甫定民志稍寧詎意天降鞠凶元首謀逆施  
利誘威迫之手段逞盜竊神器之狡心以二三宵小爲之爪牙視全國同胞有若龔  
瞽背誓食言悍然不顧列強干涉退讓自甘揆厥私衷殆不惜犧牲四百兆人之生  
命財產以爲帝王之代價忍心害理莫此爲甚此誠志士仁人所爲憤激填膺不能  
不出而維持國步者也繼堯等爲宗國安危計陳牧野之甲致討獨夫揮魯陽之戈  
願回皎日現集滇中子弟編爲護國三軍聯絡湘粵川黔誓師伐罪刻已陸續出發  
軍威所至勢猶破竹將與中原豪傑會剪蚩尤重光八表惟是首義區域軍用繁多  
負擔特重非廣呼將伯厚集餉糈無以收士飽馬騰之效而鼓披堅執銳之心素諳



僑胞高義干雲。熱忱愛國。知危必拯。有同捐乘之。茲高見義勇爲。肯讓助邊之。卜式尙冀同心提挈。毅力扶持。慨助義金。共襄盛舉。庶偕來簞食。用集底定之奇勳。重整河山。復鞏共和之大局。享幸福于斯世。實拜賜於諸君。臨穎神馳。不盡縷縷。祇頌公安。

復馬存發

逕復者。頃奉大札。拜讀之餘。且感且佩。袁氏無道。禍國殃民。人天共憤。我滇迫於大義。興師致討。數月之間。聲應全國。其故雖由於在內。諸將士之同心。亦由於在外。諸同鄉之贊助。夫兵凶戰危。滇軍乃能不顧生命。爲國前驅。此在內。軍士之所難得者。也。袁氏不顧正義。純以利祿驅人。等於牛馬。我滇人乃能慷慨獨立。脫其豢養。此在外。同鄉之所難得者也。堯也不才。賴內外鄉人之力。贊斯義舉。共成偉功。惟有竭智盡忠。以報國恩。即以答鄉誼。前因袁氏逞奸弄術。間我鄉人。子承天性。爽直爲其所欺。致舉動遲疑。滇人受害不淺。惟堯則深信龍君。終久必爲民國功人也。始終善視之。頃以我兄之力。糾合鄉人。成此偉業。此豈獨我鄉人之幸。惟堯竊有請者。粵中起



義以來。袁氏利用詐術。屢向省中。散布謠言。謂龍君獨立。全是假局。因此內外人士。共起疑心。將來恐非大局之福。我兄在彼。必竭力提醒龍君。對於滇中。必有實力之表現。一滇中起義以來。所得槍械。雖有接濟。然亦須多方採取。爲是廣東軍械頗足。應請我兄轉達龍君。多所補助。以表心迹。其二臨安所屬土匪。皆係無知之徒。前受袁氏之愚。使我弟兄骨肉自相殘殺。言之傷心。今餘匪未淨。一日則龍之心迹不明。一日應請我兄轉達龍君。請其速派專員來滇勸諭。臨屬愚民。使勿再行煽亂。以上二者。爲龍君計。爲桑梓計。實爲兩全。應請我兄竭力從中主持。勿以軍事倥傯。有所遺漏。則堯所深望者也。至在廣方面。當已電達各同人。請其對於省界仇視之見。竭力防維。各同人皆以大局爲念。或不至再有無意識之舉動。請轉達各同鄉。勿慮爲盼。以後有事。均請隨時函商。並請即轉達各同鄉知之。餘不另詳。專覆即頌公綏。

致梁任公

任公先生道席。敬啓者。袁氏叛國。自致敗亡。先生迭進忠言。曾不覺悟。海內豪傑。發憤相聞。松坡循若到滇。具述尊旨云云。彌用堅決。爲是計不旋踵。以從今役。同人淺



薄未能遠謀。深懼不克負荷。或致蹉跌。前電敬迓行旌。冀爲辰視。海山艱阻。未奉還雲。引睇春申。時深懷想。今首事經旬。部署猶定。松坡不日出川。凡諸軍師之謀。與夫地方之事。責在同人。當竭綿薄。惟大計所關。不能不仰望於先生者。厥有數事。一方今舉動一致。惟有滇黔。陳氏在川。尙思支柱。龍陸態度。亦未分明。此於大局。猶非重要。但長江下游。一有動搖。全局立可解決。而南徐北固。訊復杳然。懼或觀望徘徊。覬延刻漏。致夫已氏得以從容。布置撓我羣謀。抑恐亂事遷延。啓人干涉。所關殆非細故。先生一言重於鼎呂。之數子亦早已傾心。乞速定策發謀。相爲聲應。翹跂無窮。一滇黔夙少人才。此時居行兩方。已苦竭蹶。將來川事稍定。善後尤難。臨事周章。何能集事。滬上人才。醫集且並在先生。藥籠務乞商約。赴滇襄茲義舉。滇中外交人才。尤爲缺乏。聞溫宗堯君現在滬上。可否道達鄙忱。暫來相助。此外有相當人才。亦乞代爲速駕也。一袁氏必敗。已無可疑。同人前此遲迴。則鑒於破壞後建設之難。深用憂沮。默察現時人心。均有趨重聯邦之勢。恐遂將演成事實。惟如美如德。宜何取法。外如中央地方。權限之劃分。如何機關之組織。奚若凡此建國問題。均非先生精思密



運先決。大凡無以衷羣言。定民志。亦乞預備提示。俾當事者。並有軌轍可循。不致泛軼。以上數事。計先生籌之已熟。愚慮所及。輒貢一言。凝望前途。交並喜懼。所冀南針時錫。庶克奉以周旋。瞻望斗山。惟爲國萬千珍重。不盡縷縷。

其二

任公先生道席。自國體問題發生。一般無恥小人。逢迎揣摩。中風狂走。讀大著一篇。首倡正論。不禁五體投地。傾服之餘。彌欲親炙丰裁。商榷國是。蔡戴兩君抵滇。具述尊旨。欣悉並欲來滇一遊。經即電表歡迎。卒未奉復。意必夫已氏偵伺嚴密。動生危險。不即啓行。惟此間部署各面。業已次第進行。同人亟盼駕臨。商承一切。前已電飭海防河口等處招待員。預備妥爲照料。茲復派李君宗黃赴滬。面陳欸曲。如蒙惠然肯來。盼即尅日就道。萬一因有窒礙。未能遽離滬上。亦懇將近日常省。及北京情形。密囑李宗黃轉知。最近碩畫如何。亦祈便示。以便有所遵循。不勝企盼之至。專肅敬請道安。惟愛照不既。

其二



任公先生侍者月來一再奉書計日諒達第不識途中有無浮沉前賜函謂將於東渡後命駕西來方除舍掃榻靜候蒲輪乃頃接先生與松坡第五書暨亮儕幼蘇各函始知東行不果而來滇之舉亦因以泥阻讀之不禁惘然竊謂此次舉義本人人心理所同滇以地理之便率爲國內先引續而擴張之夫豈區區之滇所克盡其負荷況當各方面尙未大事發展不得不以此暫爲根本籌畫如財政如外交種種國家事業皆宜於此時稍具芻蕘造端既大非海內賢達相與撐持恐難得其端緒務懇先生惠然命駕並約同志多人尅日來滇共此艱難爲國計爲滇計皆不可吝此一行此繼堯殷殷盼佇之私不第爲有所秉承已也首途有日尙祈先期示知俾派人到越迎迓黃陂果能出險自可除却後來多少魔障但不知進行有效否此間鹽款彼已就我範圍允按月全交松坡駐節永甯正與占據叙府之軍合逼瀘州循若率滇黔聯軍由黔進取川東綦江不日當下東路黔軍在湘西迭占晃州黔陽沅州麻陽等處各路軍事都頗覺順利堪紓遠注此外情形屬幼蘇另函詳達翹首雲霓無任企佇海上荊棘尙乞加意防衛



其四

任公先生大鑒。月前復書計塵鈞覽。自是以來。第一軍入蜀。第三軍入湘。均已節節進攻。所向克捷。然而各省將軍。仍復擁兵觀望。未即望風響應。雖有蒙古稱兵。又聞其以擁護清室爲幟者。與吾輩宗旨。恐有不同。時局頓更。吾輩計畫。亦宜較前略變。溯自滇軍舉義。原擬俟袁逆推倒。即舉黃陂爲總統。行內閣制。以先生爲總理。屆時發表。庶不失先後程序。今審時度勢。似宜按照約法。將舉黃陂爲總統一層。及組織中央政府大概情形。先行發表。惟事關大局。非先生不能爲此大文。擬懇即撰就一稿寄滇。並寄登上海日本各報。一以引起各省之響應。一以消弭蒙古之異謀。或疑袁尙未倒。黃陂輒被舉。恐將加害。竊謂此時黃陂果被舉。見忌則有之。加害實未必。然段芝泉至今尙生存。無恙。其明證也。聞已東渡扶桑。固較上海安穩。然事變無常。仍望爲國珍重。早日歸國。將上海應辦事辦妥。即便駕臨敝省。尤深盼企。此致即頌撰安。佇候回示。

其五



任公先生箸席。溯初來奉到手書及計畫組織臨時機關各稿。詢之溯兄。沿途逆探甚多。旅行中異常困難。稿成於咫尺之艙房內。而乃計慮周密。眼光四射。如此真可謂渺滄海於一粟矣。感念之餘。欽佩曷極。組織軍務院條例。誠爲過渡時代不二辦法。均可照行。所尙待研究者。地與人之問題耳。現在成渝未下。我之範圍。只滇黔桂三省。究以何者爲合宜。撫軍長一職。究推何人爲適當。同人幾今研究。均尙未得正確之解決。仍懇先生與幹公切商。提出再徵求各方面意見。方能確定。人地既定。即可着手組織。庶對內對外。得所依據。其便利莫甚焉。溯初到滇之第三日。由外交方面傳來消息。袁氏已復桂電。承認取消帝制云云。此信若確。真可謂姦猾之尤。但鄙意若彼。取消帝制。即繼以堅決辭職。則吾輩不爲己甚。自可收拾兵事。促國家內部之建設。若只以取消帝制相餌。而總統自若。抑或假意辭職。而暗嗾一般死黨反覆。挽留則吾輩之目的未達。仍不能不繼續進行。以求達最終之目的也。幹公對於茲事意見如何。昨經電詢。尙未獲覆。即懇先生速與商榷。示知爲盼。向瀘之師。迭獲勝利。瀘城計日可下。叙府亦復歸我。有探悉逆軍內部極爲潰亂。渝城可期迎刃而解。



也餘煩溯初面罄桂事就緒尙懇屈駕來滇以慰士民渴望肅覆敬頌道安

其六

任公先生道席咫尺相違何緣之慳也邇來因電路梗阻所欲請教之事百不達一至爲耿耿頃電路通始奉到迭電且慰且佩示知倒袁各節與鄙見適有暗合目前問題帝制既終關於倒袁進行之主張如何及倒袁後之建設如何先生成竹在胸當必早有碩畫此間同人迭開會議多贊成由滬組織國民代表會爲正當之解決代表會員即以民國二年之國會議員當之但由各議員自行集合不用政府名義昨已電致湯濟武王幼山諸君矣又我君前途消息川湘方面均在停戰期間故戰狀無何等之發展惟我軍仍籌備實力節節進行將來作戰計畫應用全力注重擬以第二軍長李協和所領軍隊暨第三軍之一部並挺進軍補助蔡軍以第一軍右翼司令戴循若所領軍隊補助王軍蓋訴諸政治法律恐不易發生效力故仍積極籌畫進取方法訴之於武力管見如此未識當否前示軍務院組織條例及各公電宣言書極佩偉畫惟自帝制取銷後是否仍照舊組織軍務院地與人之間問題如何



會澤文牘  
決定。疊經前電奉商。只因電信阻隔。是以久未奉覆。將來究應若何組織。地點應在何處。撫軍長應否設置。抑或即由軍務院所在地都督代表。務請就近與幹公從速籌商見示。桂省自宣布獨立後。又得先生盡籌力爲主持。成功自易。翹瞻三筭。忭頌良殷。茲特派敝府參議林君贊侯。交涉員徐君保權到桂。乞賜接洽。並代致繼堯及滇省全體軍民父老子弟之懇忱。歡迎先生來滇。一切詳情。即由兩君面陳。臨穎神馳。不盡縷縷。敬頌道安。諸希爲國珍重。

## 其七

下卷  
任公雲階先生侍席。疊奉電示。具佩賢勞。肩任奇艱。惟善自珍。攝爲望。各省相繼獨立。衆論靡雜。軍務院之成立。似屬不可再緩。惟浙黔諸省。既經宣布。亦不能不通知聯合。究應如何統祈盡籌。主張徑辦。以期敏速。滇省僻遠。消息多阻。種種應商事件。文電容有未詳。茲派富滇銀行協理前國會議員由宗龍王楨躬詣台塔。就聆教言。兩君於滇省情形。及應商承之件。均能代陳。祈進而教之。不勝幸甚。專肅敬頌。勛安。惟鑒不備。



其八

任公先生道席前申尺素有所請益未審是否得達辱教逾恒獎飾慙感不勝屬轉四書並已急遞松所比諗祖楫東渡爲國宣勞延睇海雲惟祝多福此間軍行計畫粗定松坡已率第一軍入川李協和君率第二軍不日由桂入粵堯擬自率第三軍於川事略定後道黔出湘與一二兩君會師武漢爲最後之決戰頃第一軍入蜀已節次攻下叙瀘伍馮兩旅望風奔潰第三軍前隊東出亦已占領晃州順逆之勢既略可睹乃桂師狀況始終未明滇黔方面均不免稍受牽掣頗出意外然同人首事之時既決死一致誓以滇黔之力與賊併命決不因外界之嚮背有所欣戚內部情形足可告慰惟是同人志慮短淺膺此鉅艱時冀得親指示俾克奉以周旋滇各界人士亦莫不延頸跂踵亟欲望見顏色以爲快仍乞台旆東反後惠然肯來實爲深幸耳昨奉寄示擴充富滇銀行議規畫宏遠亦復切實可行已照印轉布特滇中現實無能任此擬請代求相當人材來相助理俾得早日集事湯覺頓兄如能枉屈尤極歡迎也餘如前書所言並冀入覽後立賜裁答西林先生處已另函奉迓周君委



狀已發提用鹽款事。日內即可解決。並以奉聞。匆匆不盡。惟爲國萬千珍重。

復龔振州

振州仁兄執事。自星港先後來書。均悉執事遠涉南洋。勸諭聯絡。大致就緒。爲國辛勞。忻念忻念。呂君天民。現已前往繼續辦理。計可速著成功。所擬致慰僑商一層。自可照辦。現已具書多份。逕寄呂君酌發矣。古君來滇。業經接洽。併告特復。即頌台祺。

致慰華僑

先生執事。久慕隆名。懷思綦切。海天遙隔。瞻望爲勞。比得敝處所派籌餉代表報告。悉義軍籌餉。深賴執事大力贊襄。無任欣慰。袁氏傾覆共和。國人共憤。荷戈之士。再接再厲。誓達擁護民國之目的。所盼餉源不乏。俾得努力前驅。尙冀執事益矢熱忱。勸諭僑胞。源源輸助。他日紀功論績。執事之榮光。當與國家仁永無極也。桂粵相繼助義。大功之成。指日可得。知注特以附告。順頌義祺。不宣。

復岑西林

雲階先生執事。爲國劬勞。正深殷念。適奉四月八日示書。既蒙垂注之殷拳。復荷寵



飾之逾分。循省之下。感與慙并。繼堯樛櫟之材。只以國家大義所在。弗敢自即暇逸。故願負屬橐鞬。爲諸公前驅。所幸將士用命。同志勸。西南應求。漸見效吳。頃浙又宣布。哀逆勢孤。理屈當可不擊。自斃。惟其鷹犬之輩。尙思倚爲泰山。則駑駘戀棧。又不免中途作梗。公既赴粵。聲威所臨。羣喙自息。所望紓籌碩畫。提挈進行。俾國家大計早日得定。不勝幸甚。鱗鴻有便。尙希時惠好音。肅復敬頌助安。惟鑒不備。

唁梁任公

任公先生禮次。前聞太翁仙逝。惋悼曷勝。當派由幼先陳維藩兩君代表前來。一伸弔唁。旋即會銜肅電。奉候孝履。並懇我公援金革不避之義。早出任事。計已先後得達。清聽在先生性成純孝。哀毀之情。自難譬解。第念太翁壽德之全。重以先生名望之盛。善繼善述。當無遺恨。先生維持大局。奠定國基。此天下仰望之心。亦太翁未竟之志也。尙祈先生善體此志。節哀順變。移孝作忠。葆中流砥柱之身。慰霖雨蒼生之望。庶重任之寄。中外同瞻。不僅同人之幸。實國家之福也。大雲出岫。饑渴同深。堯等遠隔鵬程。維殷鶴企。莫親鶴弔。抱歉螳衷。茲謹共致奠儀五千元。輓聯一副。聊當芻



束。尙望代薦爲幸。專肅奉唁。並請禮安。

輓聯附錄

惟公兼福壽之全。尙有典型。碩德允留千古範。  
有子爲安危所繫。同欽泰斗。盛名應慰九泉心。

其二

任公先生苦次。前得滬電。驚悉太翁棄世。震惋欲絕。夙稔先生純孝過人。深慮哀毀滅性。當此國難方殷之際。先生一身關繫非輕。經即電達愚忱。藉伸悼悃。力懇先生順變節哀。爲國自重。並派由幼先陳維藩兩君代致弔唁。計均上達左右。頃奉五月二十八日賜書。至性至情。流溢楮墨。惟是國家多事。當移孝以作忠。墨經從軍。在昔賢所不免。務乞援金革不避之義。於大事告厥。即行出而任事。俾國家人民早得久安。不惟先生忠孝兩全。太翁有知。亦應含笑於九泉矣。專復奉懇。卽叩禮安。

復岑雲階

雲階先生大鑒。久欽偉抱。良晤無由。雲海相望。彌殷馳系。頃奉惠書。敬悉種切。滇省



此次倡義。本欲繼先生未竟之志。爲同胞請命。蓋袁氏謀逆。帝制自私。既違國憲。又召外侮。對民國爲不忠。對前清爲不義。凡有人心。莫不憤激。繼堯爲國效忠。已歷四稔。擁護共和。本其職志。誠不忍以艱難締造之國家。爲神奸所斷送。乃率吾滇子弟。仗義出師。天相中國。或克殲此獨夫。重光漢土。惟滇處邊隅。舉義以來。百端待理。外交內政。事事需材。夙仰先生才高望重。薄海歸心。况滇省爲勦勤公艱難締造之地。我公善繼善述。尤此間同人所欣企無窮者耶。切盼大駕蒞滇。就承明教。倘能不我遐棄。惠然肯來。定當掬誠歡迓。以便商承一切。至於名義上之職務。斷不敢以煩執事也。松坡鎔軒刻已率軍隊出發。頃由前途傳來消息。川事已大得手。合并奉聞。專此肅復。敬頌挾安。

其二

雲階先生麾下。頃奉手翰。並誦副楡。祇聆種是。近日粵桂滇黔電報。遲滯異常。非四省合力整頓。必將貽誤事機。已遵囑電商黔督。設法取締矣。先生老成碩望。獎掖後進而躬自下之一意。惟以國家爲前提。摛抑公忠。實深敬服。弟德薄能鮮。謬膺重任。



竊懼弗勝。惟冀時錫匡規。俾無隕越。責任所在。弟亦不敢不勉爲其難也。鎔西到此。已將月餘。相得甚歡。知注并及。專此奉復。敬請勛安。

其三

雲階先生執事。昨屢上書。計邀省錄。煥熱漸盛。伏維履祉增綏。頌如所祝。袁逆取消。帝制仍復。覲然人面。戀棧高位。以詭譎素著。威信全失之人。代表一國。對內對外。均礙進行。於法於情。萬難恕免。側聞我公憫國勢之顛危。順羣生之仰望。不辭勞瘁。惠賁輿囂。東山旣出。中外觀聽。爲之一傾。知郵治保邦。指揮若定。三軍之氣。自茲愈振。元惡之膽。因之而寒矣。顧鄙意獨夫一日不去。戰事一刻難寢。精神偶弛。前功必棄。前途險象。曷可勝言。爲今之計。舍力整戎。行以圖進。取殆無其他善策。惟滇自出師。川湘以來。餉械羅掘。各方俱窮。以貧瘠素著之省。支應至數月以上。竭蹶情形。不問可知。設非停戰延期。早已捉襟見肘。用懇我公將在東籌集餉械。鼎力主持。從速運滇。以濟眉急。此外更望就粵省隨時籌措。源源接濟。俾收勝利之效。要之此次不得已之舉。滇省負擔既重。時日較長。我公大局素所關懷。滇省夙叨摯愛。當不河漢視。



之也。特遣兵站總監繆君嘉壽趨詣崇階敬詢起居身福並面陳一切願晉而教之俾該員得有所遵循早日運滇不勝迫切待命之至臨穎依馳不盡願言祇頌助祺諸維爲國珍重。

致楊鼎臣朱經田丁衡三

鼎臣經田衡三先生賜鑒前電諒達鈞聽茲尙有未盡之意請再爲先生陳之竊袁氏自任職總統以來歷時四稔矣繼堯平昔對於袁氏本極端擁戴以爲吾國今日人才難得如袁氏負天下重望握最高政權吾人當固其地位聽彼設施計日程功必能徐圖興盛與民更始不意四年以來凡百施爲均違民意加稅以重累吾民定約復喪失權利內不能刷新庶政外不能取信鄰邦近復背誓食言妄行帝制不惜以四萬萬生靈爲犧牲以五千年古國爲孤注方帝政之準備告終而外人之警告忽至前途危險匪可言喻况當此千鈞一髮之時稍一不慎卽陷淪亡豆剖瓜分已萌朕兆繼堯服務民國歷有年所爲國效忠本其天職故自帝制發生羣相附和而繼堯等返之良知實難默息加以軍民憤激尤甚故默念大局內慮及羣情之憤懣



外。愧。於。強。鄰。之。干。涉。大。義。所。在。無。可。諉。謝。迭。電。忠。告。袁。氏。勸。其。取。消。帝。制。以。維。國。本。而。定。人。心。未。得。答。覆。勢。不。獲。已。乃。率。吾。滇。子。弟。奉。辭。伐。罪。但。行。良。心。之。所。安。其。他。成。敗。利。鈍。非。所。計。及。區。區。苦。衷。當。能。爲。先。生。所。鑒。諒。惟。先。生。繫。吾。滇。父。老。之。望。今。茲。義。舉。實。望。鼎。力。贊。協。倘。能。桴。鼓。相。應。會。與。四。方。豪。傑。殲。此。獨。夫。挽。旣。倒。之。狂。瀾。維。垂。危。之。國。命。將。來。共。和。永。建。民。國。重。新。則。先。生。之。勛。名。足。垂。不。朽。匪。惟。國。家。之。福。抑。亦。桑。梓。之。光。也。如。意。存。觀。望。甘。爲。袁。氏。所。利。用。則。是。服。民。國。之。官。食。民。國。之。祿。不。爲。民。國。圖。報。直。成。民。國。之。罪。人。而。已。先。生。明。達。當。不。出。此。夫。前。之。忠。於。袁。氏。者。未。嘗。無。人。而。今。皆。何。如。者。蓋。袁。氏。爲。人。狠。鷙。成。性。偶。持。異。同。禍。卽。隨。之。以。段。馮。諸。將。士。之。忠。誠。而。被。殺。而。見。疑。以。梁。湯。諸。君。子。之。正。直。而。遭。忌。而。潛。逃。兔。死。狗。烹。烏。盡。弓。藏。古。有。明。鑒。可。爲。寒。心。况。忠。於。一。人。與。忠。於。一。國。孰。得。孰。失。不。辯。自。明。爲。公。爲。私。尙。望。熟。計。臨。穎。神。馳。切。盼。明。教。

## 致滇省在外服官同鄉

逕啓者、中國自辛亥革命共和肇造。四載於茲。袁氏以國民公推爲大總統。兩次即



位宣誓。皆言遵守約法。擁護共和。皇天后土。實聞斯言。曾幾何時。輒欲變更國體。自爲帝制。頃雖官吏勸進。代表解決。皆由利誘威迫。非出本心。數月以來。羣情痛憤。以致列強警告。國勢阽危。堯等爲維持大局。以順輿情起見。業已具電忠告袁氏。勸其取銷帝制。並將倡議諸兇。明正典刑。以謝天下。彼昏不知。褻如充耳。方且籌備大典。日不暇給。背誓食言。悍然不顧。途窮日暮。倒行逆施。義憤所激。勢不得不聲罪致討。現各省表示同意者。已聯翩而起。足見此心此理。盡人皆同。業已預備一切。合軌進行。至於地方秩序。照常維持。人民安堵。我公熱誠愛國。誼重桑梓。服官在遠。未悉內容。用特布達。并望指示一切。無任翹盼。

### 復廣東北伐總司令段問泉

問泉仁兄麾下。遠隔英姿。莫由把袂。得手翰具。見愛國熱誠。溢於言表。欣佩曷極。前以袁氏違法。禍機四伏。滇處兩強。危尤特甚。不能不勉急於難。以固邦基。賴衆志成。城致有今日。堯何力之有焉。辱獎有過。愧忤何如。目前黃陂繼任。元首得人。當同爲欣慶。將來規復一切。自少疑問。粵匪得尊部隨時掃盪。民垢滌清。指顧間耳。臨書悵



惘未盡所懷。藉候旌麾百益。

致徐季龍張溥泉谷九峰王亮疇章行嚴

季龍溥泉九峰亮疇行嚴先生偉鑒。久欽山斗。未遂瞻韓。遠隔滄溟。彌殷慕爾。比想起居住善爲頌。啓者滇省此次倡義。本出於勢不得已。蓋袁氏謀逆。帝制自私。既違國憲。又拂輿情。凡有人心。莫不憤激。繼堯服務民國。已歷四稔。擁護共和。本其職志。誠不忍以艱難締造之國家。爲神奸所斷送。乃率吾滇子弟。仗義出師。天相中國。或克殲此獨夫。光復故物。惟滇居天末。舉義以來。庶務叢脞。百端待理。外交內政。事事需才。素稔先生才雄管樂。學綜盧孟。繫蒼生之重望。爲溥海之導師。此間同人。亟盼大駕賁臨。贊襄一切。倘能惠然肯來。不我遐棄。定當掬誠歡迎。虛席以待。臨穎神馳。俾望明示。專肅佈臆。敬頌道安。

覆鈕永建諸君

敬復者。頃奉惠書。備悉種切。袁氏謀逆。溥海同憤。滇省興師救國。本出於勢不得已。所幸將士用命。尙能所向有功。昨得前途消息。滇軍已確占領叙瀘等處。黔軍已占



領晃州好音傳來國人歡躍。惟堯以非材當茲重任。汲深綆短。時虞隕越。諸公負海內重望。一言重於鼎呂。舉足判夫重輕。尙冀通力合謀。本心理之。大同促全國之一致。庶會師吳楚。直搗幽燕。袁氏能早一日撲滅。大局自早一日奠定。區區此志。諒有同情。並冀時賜南針。以匡不逮。如蒙惠駕來滇。匡助一切。尤深盼禱。專肅順頌道安。

致章行嚴

行嚴先生大鑒。前上燕函。諒達左右。頃得川湘方面消息。我軍已確實佔領叙瀘。晃沅。好音傳來。國人雀躍。獨夫授首。指日可期。惟滇處天末。舉義以來。百端待理。外交內政。在在需才。先生學問才華。中外共仰。此間同人。亟盼駕臨。倘能惠然肯來。大抒偉抱。匪特爲滇南造福利。民國前途。胥有攸賴也。海天相望。無任拳拳。祇頌箸安。並希亮照。

其二

行嚴仁兄先生執事。奉誦環雲。彌殷企仰。溯自舉兵以來。幸賴執事及諸同志毅力贊襄。漸收效果。惟一切進行大計。正待籌商。滇中人材缺乏。不免有拮据之虞。承慨



允來滇相助。正如聞空谷之足音。不禁蛩然而喜也。粵事得西林前往。不難計日勘定。仍盼即日束裝。與鎔西偕來。此間當掃榻以待。餘俟面罄。專候壽安。惟鑒不備。

## 其三

行嚴先生足下。迭披惠翰。備荷注存。徐保權回滇。復奉手書。雖誦迴環。如親警欵。藉謠磐銘。進息籌筆。懋勛允符。凡祝弟才識短淺。謬承西林諸公推舉。負荷既重。隕越滋虞。來函獎許過情。期望至厚。媿赧之餘。益深奮勉。台駕至今未見。惠臨杖杜。道周懷思。徒切嶺雲在望。苑結奚如。鎔西已到此間。朝夕把晤。匡益良多。每爲道及宏識孤懷。彌令人神溯於紫芝眉宇也。專此佈覆。敬頌箸祺。

## 覆孫洪伊

伯瀾仁兄先生執事。五月二十五號。始奉讀三月十四號惠書。既蒙寵飾。復錫謙言。感甚媿甚。組織政府之說。此間初未與港滬同志有所商榷。亦並無何項主張。惟自舉義以來。駐滇外人。謂既與袁政府斷絕關係。當然自樹。我中華民國。必須有一臨時機關。一切事件。方便接洽。始電梁任公。就各方面情形酌議。爾時任公擬寄一軍



務院組織條例極爲簡括。且聲明可隨地移轉。正式政府成立。可即撤廢。一切辦法。均具有彈力性。堯以爲尙屬可行。然以響應之省無多。事務簡單。殊無設置之必要。亦遂置之。迨桂粵相繼獨立。川湘兩省義軍紛紛繼起。海內外就商之事日繁。凡屬於軍事財政外交上之事。尤苦無所折衷。勢不能不有一臨時機關。以資統一。而策進行。當復電商梁陸諸公。因電線梗阻。未卽到達。本月中旬。乃獲梁陸諸公電。則謂已照前擬條例。次第發表。並謬舉堯任撫軍長。自維輕材。萬難勝此。經卽一再力辭。卒不獲命。然內部實無所組織。不過藉此機關名目。稍有所統攝耳。頃者海軍効順。以及籌餉運械諸事。以軍務院名義對付。亦頗收敏活之效。事已見諸實行。無可再議。惟盼袁氏早日退位。亟謀統一。則臨時之機關。當然廢除。似亦不至大有妨害。至函示可慮四條。剴切詳盡。極佩盡籌特事逾兩月。情況與前稍異。故爲溯言如左。現在大局情形。究應如何。迅圖解決。尙乞不吝教言。俾有參證。爲禱。專覆。敬頌壽安。

復上海徐謙

季龍先生大鑒。海天遙隔。時企英姿。接展大緘。備承藻飾。此次滇中舉義。乃出於維



持國體擁護共和不得已之苦心。亦世界潮流大勢所趨不容已之公意。閣下過事推許。謂爲民國史之惟一義戰。逾恆獎譽。何以克當。幸自首事以來。黔旣響應。桂亦贊同。如川如湘。疊得順利。近得北來消息。袁逆已取消帝制。然猶戀棧總統。將來如不得正當解決。此間萬不中止也。惟滇處邊遠。需才正殷。閣下才華卓越。實所傾慕。尊論謂近今之最可憂者。尤在國民道德之墮落。誠爲扼要之見。前由九峰兄代致鄙意。一爲勸駕。正將有藉於碩望。一樹其楷模耳。尙祈惠然早臨。發抒偉論。俾得時資匡益。無任禱切盼切之至。專復。祇請道安。不盡。

復王寵惠

亮儔先生史席。傾慕左右者久矣。中更多故。未遂瞻韓。乃者以顧問相屈。蓋欲藉重弘猷。以匡國是。辱翰承允。獲遂初心。卒仍以國事倥傯。未能遽離。自當虛左以待。方規雅度。益用神馳。目前國計。不畏統一難謀。慮在善後無術耳。高明當所洞燭。幸時有以教之。暮雲江樹。馳系良深。臨池依切。不盡所懷。復候壽祉百益。

復汪精衛諸君



○○先生公鑒。頃奉四月十一日賜書。並中法教育會章程。敬悉。壹是諸先生苦心孤詣。從事外交運動。遙應民軍。握要之圖。賢於師旅。會章三類。體用兼賅。言近旨遠。致深欣佩。極表贊成。承示所當注意一端。洞見癥結。具徵卓識。現逆首雖伏。天誅而國本時虞搖動。預防思患。仍望考察情形。隨時見教。是爲至禱。尊處特派員李君光漢。刻已到滇。餘事當與詳商。滇境託庇靜謐。惟財政奇窘。措置自不易耳。匆肅奉覆。敬頌道安。

致溫欽甫唐少川王亮疇

欽甫、少川、亮疇、先生大鑒。月前肅上蕪函。諒達典籤矣。頃得川湘等處消息。我軍已迭獲勝利。蜀既佔據。敘瀘湘亦奪領。晃沅寶慶常德。指日可下。捷音傳至。舉國歡呼。袁氏之亡。可立而待。惟滇處極邊。舉義以來。庶務叢脞。外交方面。尤亟需才。蓋袁氏在國法上。既喪失元首資格。在國際間。卽不能爲人民代表。今欲對於外交上。鞏固信用。增進輯睦。非有望隆中外者。不克勝任愉快。夙稔先生聲華卓越。薄海同欽。此間共事諸人。亟盼貴臨。倘能命駕南來。必克增輝壇坫。此日與列國交際。多得一分。



援助將來於民國前途自多獲一分福利也。臨風延佇。敬迓高軒。專肅順頌道安。諸維亮察。

覆吳貫因藍公武

澤 敬覆者。久企光儀。末由把晤。適奉賜書。承獎飾之逾恒。益慚感之交集。繼堯謬膺疆  
文 寄。盡瘁國家。此次興師。勢非獲已。所幸同志贊助。迭應鼓桴。粵桂傾心。川黔協力。目  
前局勢發展。袁氏大受打擊。已將帝制取銷。但袁氏威信掃地。豈尙堪代表人民。苟  
其終戀棧豆。則關於倒袁問題。尙待多方研究。蓋吾國今日。實處極難地位。兩兄具  
有世界知識。何以教之。敝省僻處邊隅。人才寥落。一切進行事務。均在在需才佐理。  
夙稔兩兄才雄管樂。學綜盧孟。倘能不我遐棄。惠然肯來。則借重碩學。以匡不逮。其  
於政治上。必克收最大之效果也。引領東望。企盼奚如。專此肅復。即頌道安。統希電  
照。

卷 下 致張溥泉湯濟武王儒堂王幼山陳俊明諸君

溥泉幼山濟武儒堂俊明先生公鑒。敬啓者。滇以擁護共和。不獲已而興師。所幸同



志贊助。局勢日張。川黔既已協力。粵桂復表同情。袁氏迫於大勢已去。人心已解。業將帝制取銷。但其威信掃地。罪狀昭然。豈復能代表人民。再尸職位。故以國法而言。既斷無仍爲總統之理。以政治而論。數年之敗壞。亦無復有振興之望。惟查總統一職。原係根據約法。由國會公選。今欲求正當之解決。仍應根據約法。訴諸國會。特此時依法選舉。議員緩不濟急。查民國二年之國會。係照約法組織。爲真正之民意機關。所選出議員。又係真正之國民同意。當時國會甫經成立。即邀各國之承認。是中華民國之完全成立。與在國際上得享有平等權利。實自國會成立之日始。前此參衆兩院議員。本爲袁氏一人之私意。取銷而各議員代議資格。當然存在。茲擬按照前次正式國會議員資格。分函邀集。就滬上組織國民代表大會。恐一時人數不足。並通電各省。可酌派資望相當者。每省二人。共同加入。爲根本上之解決。既與法理不背。復合政治之途。轍此間同人。再三詳究。詢謀僉同。用特懇請諸公。登高一呼。必能爲洛鐘之應。倘能及早解決。則兵禍早紓。亟圖內部之建設。其裨益國家。匪淺尠矣。諸公望重斗山。譽隆中外。匡時愛國。素具俠腸。務懇從速着手進行。不勝企禱。至



應用何種手續。並請卓裁。至於需用旅費津貼。及一切會中用耗。滇自當妥擬辦法。接濟。合併聲明。專肅敬頌公安。諸希爲國自愛。

## 復谷九峰

九峰仁兄閣下。頃展復書。已承俯就顧問一席。此後一切計畫。尙盼隨時見示。受益多多矣。如能得惠然賁臨。時親偉度。暢領教言。尤爲私衷之所歡迎者也。袁氏勢窮力蹙。乃以取銷帝制爲緩和之計。居心狡詐。其誰信之。承示已由海上名流。聯函大樹。阻其勿中詭謀。又由國會議員。聯電各國公使。表明我中華民國。正確民意。如此辦法。甚善甚佩。此時袁果自行引退。尙可和平解決。如仍戀棧。則我義師。詎能中止。故刻雖停戰。仍嚴戒備。我兄高明。當亦謂然。至於粵東。近已宣布獨立。似可無煩兵力矣。鱗鴻有便。願聞玉音。專復。祇請台安。

## 其二

九峰先生大鑒。頃展惠書。備悉。豈是承示各節。偉謀碩畫。無任欽遲。目前局勢。自廣西宣布獨立後。袁氏大受打擊。已將帝制取銷。但帝制雖經取銷。倒袁問題。尙待研



究此後欲得圓滿之解決。恐不能專恃武力。必須另求他種抵制方法。再以武力爲後盾。較易收效耳。尊論主張極是。此間同人亦復計及。亮疇行嚴谿西諸君。晤時尙乞代爲致候。並請催促南來。贊助一切。是所企禱。專此奉復。順頌道安。諸希亮答。

復法京巴黎謝東發吳永珊李汝哲諸君

敬復者。昨覆一函。諒邀鑒及。海天遙隔。正切馳思。接展惠書。暨洋文函稿。截報均經領悉。承示英議員贊助民軍各節。具見諸君聯絡有方。交際得道。復乘機將宣言書印送各界。以免袒袁。又發兩電。迫袁退職。同心愛國。無任欽遲。招工事件。已得李君石曾與法政府訂約。先於民軍勢力所及之地。招募五千人。以堅法人信服民軍之意。益敦國際親睦。所見甚當。現李君光漢到滇。俟與妥商辦理。至英報所稱蔡松公與川督議和等語。並無其事。袁氏向比美兩國借款。忍心賣國。實爲可恨。尙望諸君就近警告。促其注意爲荷。至於函電梗阻各節。越南政府不無可疑。證以歷次交涉可知。尙希諸君隨時調查。舉發爲要。現在袁氏已逝。黎公已依法繼任。外人極爲滿意。國家根本。從此可定。惟後事正多。前途茫茫。希諸君隨時注意爲禱也。專復。即頌



台社

復國會議員

敬復者接展手書如親德範欣慰私衷匪言可喻袁氏逆謀天人共憤義幟甫張黔桂繼起粵浙江楚因之以應元兇滅亡指顧可期惟是莽卓既誅大難方始所望諸君子遣辭發慮宏裕溥博理革前弊施政有方以後進行一切尤冀時告碩籌是所嘉賴陸劉兩函加封郵寄並以附聞臨池神往不盡依依

致張鎔西

鎔西仁兄道席前接自日本東京來書欣悉畢業大學遄返宗邦方期便道回滇藉傾積愫而才高望隆竟爲有力者羅致不獲一聆教言悵何如之自國體問題發生都中志士仁人相率遠引冀得有所藉手以救國家就諗台端亦避地滬上密爲策畫既欽高義尤仰盡籌私衷拳拳無時或已繼堯服務民國四稔有餘共和國家卽是第一生命豈忍聽神奸巨蠹一朝斷送是以奉辭伐罪敬從諸君子後一腔熱血願灑神州苟天相吾國誓必殲此獨夫光復故物惟是滇處天末人材消乏舉義以



來軍事之進行。建設之預備。以及外交內政。在在需才。佐理素仰。台端梓桑誼切。管樂抱宏。爲時會之導師。繫蒼生之雅望。亟盼大駕賁臨。贊襄一切。倘承不我遐棄。惠然肯來。定當掬誠歡迎。虛左以待。專候明示。臨穎神馳。敬頌壽安。

其二

鎔西仁兄道席。昨泐寸函。略陳近狀。並勸大駕南旋。贊襄新治。計當達覽。頃披手翰。迺以滇中舉義。備荷藻芬。並知台端現居海上。密運宏籌。着着進行。莫名欽佩。南中消息。近已準備。義聲丕振。甚盛甚盛。此間迭得川中捷音。我軍業已先後佔領叙瀘。至湖湘方面。亦爲黔軍攻取。晃州師直爲壯。諒足下聞之。當亦以手加額。同爲稱慶也。長江流域。仍望從速規畫。早出石頭。庶會師吳楚。直搗幽燕。伐罪弔民。復還故物。實惟先生左右之力耳。翼廷已抵東。昨經由省派機秘委員前往歡迎。相機妥慎。對付諒不至爲其所愚也。知念併及。茲附寄近日文告數張。卽希查閱。海天遙望。無任神馳。專復敬頌壽安。

其三



鎔西仁兄道席前上一函。諒邀清睽矣。頃得前途消息。川湘方面迭獲勝利。叙瀘晃沅確已佔領。好音傳至。舉國歡呼。袁氏之亡。可立而待。惟吾滇僻處天末。舉義以來。百廢待舉。外交內政。事事需人。吾兄誼切桑梓。愛鄉之情。必不後於愛國。此間同人。亟盼南旋。倘能惠然肯來。匡其不逮。非僅繼堯一人之幸。三迤同胞。實共賴之。臨穎不勝翹企之至。專此順頌旅安。諸希愛照。不備。

其四

鎔西仁兄先生足下。頃奉由滬寄來一函。誦悉一切。我兄精心遠識。辦事周到。感佩無已。數日以來。佇望高車。等於飢渴。故鄉多事。尚乞早日命駕。來示愚蒙。行嚴先生如能不棄邊遠。慨然偕行。則更盼慰之至。更祈抵海防時。先示電音。俾便專接。特復並頌旅安。

致李印泉

印泉學兄執事。昆湖一別。寒暑四更。時事日非。聿彰才智。言念袍澤。悵望深之。邇者神奸盜國。欺世誑民。大局之危。有如纍卵。弟以受民國重託。義不苟隨。爰舉義師。大



張撻伐。所幸諸將士戮力同心。海內外諸同志提挈進行。義旗所向。諸路克捷。叙瀘既下。辰沅得手。行將會師武漢。直搗幽燕。還復共和。斡旋危局。惟是造端宏大。端賴衆擎。吾兄懷抱宏深。愛國心切。務望即日束裝返滇。匡助一切。此間同人。鞠誠歡迎。虛左以待。倘承慨諾。薄言旋歸。不僅滇人之幸。亦民國全體同胞之幸也。餘容面罄。專候籌安。佇候回玉。

其二

印泉學兄偉鑒。張瑩珊兄抵滇。接展手書。並述大教。愈切嚮往。袁氏雖有取消帝制之令。猶存覬覦神器之心。非重集各路精兵。直搗幽燕。恐難收完全效果。粵桂方面。得我兄與岑陸梁諸公。主持規畫。此後進行。自然着着勝利。此間現專注重四川一路。蔡軍大集納谿一帶。斐章行將率隊由叙進發。惟餉械奇絀。昨派繆元之晉謁。祈設法撥濟。是爲至要。瑩珊明晨起程回粵。忽復數行。不盡願言。餘由瑩珊面達不贅。敬頌旅祺。伏希爲國珍重。

其三



印泉學兄偉鑒。滇垣分袂。瞬已數期。契闊之懷。彼此想當一致。半載以來。每於公電中。獲接警欵。稍紓積思。此次徐寶泉回滇。奉到手書。雅誦之餘。彌深懽慰。現在神奸雖逝。憑城狐鼠。未盡掃除。大局卽未底定。責任所在。弟亦何敢不勉爲其難。來函勗勵殷然。敬聞命矣。承示西林精神矍鑠。遇事果決。應舉之務。次第就緒。聞之欣忭。茲後鱗鴻有使。尙祈時惠好音。序屆炎蒸。起居珍衛。是荷。覆頌台安。

覆楊起元

澤濱司令執事。逕復者。接三月十四號手書。展誦之下。不勝詫異。執事知袁氏敢於盜國之故乎。袁氏操莽性成。迹其在職四年。固無日不以化國爲家。爲惟一之務。而又有一般薰心利祿。蠅營狗苟之輩。爲之左右。日夕詆共和政體之不適。以是助其逆謀。指顧義軍北擣。組織法庭。審判元奸。此輩助逆黨徒。自必一一予以相當之處分。來書以帝袁爲幸事。復以救濟餉項。保升功名。諸說。污我義軍之聽聞。何臭味與。上述助逆各黨徒類也。惟來書頗就國家立說。則姑略心論跡。爲執事長言之。冀有所覺悟焉。執事謂抱國家思想者。當以國家爲前提。今試問。所謂以國家爲前提者。



爲保國乎爲亡國乎度執事決不敢悍然曰爲亡國則試問密謀加入協約遣派賣國大使以求遂其帝慾是否將陷吾國於萬劫不復之地乎袁氏稱帝不惜亡國志士仁人謀保國之道舍討袁外更有他道乎我滇省父老昆季寧不痛心於同室之操戈顧帝袁則亡國討袁則尙可求一線之生存用是兩害取輕同心倡義差幸風聲所播薄海同仇今袁氏自知勢窮力蹙二三鷹犬斷不足抗我義旗於是宣言取消帝制冀以釋怒於全國不知自帝制發生以後五國警告特使被拒益以製造民意各種奸謀披露舉國太息痛憤對內對外信用全墮更何能儼然代表一國况元首謀叛載在約法已爲法律所難容加之袁氏及其黨徒寡廉鮮恥履任時之煌煌誓語尙轉瞬等諸弁髦此時勢窮力蹙之宣言更何人敢爲之保證故義師北征誼無返顧必明正袁氏之罪剷除亡國之根苗決不敢苟安一時重貽將來之大患至共和政體之優良玩來書語意似亦執事所信仰所慮者僅在教育之未能普通生計之未能發展則試問自國會解散以後大權操諸一人彼袁氏所行之政除增加苛稅敲剝脂膏供預備帝政之揮霍及助逆各黨徒之侵蝕外其爲人民謀教育之



普通者何在其爲人民謀生計之發展者何在自治之制廢而學校之數驟減取民之額增而溝壑之填日多率是以往將民智日塞民困日深近鑒安南遠徵埃及亡國滅種計日可待尙何共和之足云故欲躋我國於世界最良政體之列尤非決心去袁不可民國初元政治之未能盡合軌道固無可諱言然試一繙世界共和各國歷史改革之際較之吾國尤有甚者惟志士仁人積其經驗徐謀矯正用能終達改良政治之目的若以共和制之推行未能盡利遽欲復君主制以易之是怯喬木之多風而欲下幽谷以避之也義軍倒袁以後與國人共謀更始並懲前度之失而預爲之防福國利民必於是乎在執事姑徐以觀之執事又謂滇省地瘠民貧固也然今茲之役毀家助餉投筆從戎之士不絕於道加之海外僑商望風慕義輸財濟械數達千萬蔡李諸公忠誠爲國矢志不回執事乃以怨讟煩興捲欸而去等詞謬相揣測夙聞袁軍沿途淫掠軍行所至雞犬不甯執事殆習於是故言之如此耶義軍萬衆一心決非簧鼓之詞所能煽惑現在黔桂同風龍軍釋甲粵湘各屬紛紛宣告獨立晉魯諸省響應北方而揚子江下游馮將軍態度嚴明屹如山鎮袁氏日夕防



維不安寢饋。浙朱贛李與金陵勢若連雞。袁氏兵餉兩窮。授首之期。計在指顧。蓋順逆之勢。既異。故成敗之分。愈明。執事同爲國民。應知大義。去逆效順。功在河山。况陳將軍受知黃陂。黃陂辭僞爵而不居。陳將軍豈甘爲僞廷之鷹犬。前者迭與義軍通好。情辭懇摯。徒以事實上之阻礙。未克立建義旗。執事若更黯於事情。必至身敗名裂。既承知念。敢盡忠言。前者執事率犬羊之衆。乘我不備。在滇邊焚掠良民。慘無人道。實爲天理國法所難容。但能反旆來歸。不特著歷史上之令名。並可懺良心上之惡孽。義軍大公無我。決不修及前嫌。生死禍福。決於須臾。惟執事熟圖之。言不盡意。伏維珍重。

覆謝東發吳永珊李汝哲

頃接法字第一號來函。具見熱心爲國。籌畫周密。不勝欣佩。承詢三節。一承認問題。此間以爲此次民軍之所以戰爭者。即爲爭回各國曾經承認之中華民國是也。於法理上事實上均覺要求承認事屬重贅。且一要求必引起無謂之波折。故至今迄未議及之不識尊意以爲如何也。二德人借款現尙無此事。或係袁世凱借以欺騙。



會澤文牘下卷

外交煽動各國諸兄在彼乞注意爲禱。三英領調和事在初起義曾探試二次。經嚴詞拒駁不復來矣。至統一機關各起義省分皆以爲急宜設置。現組織一軍務院。互選堯爲撫軍長。經屢辭不獲。現已於五月九號宣告成立。地點暫在廣東。但堯在滇一時不能脫離軍務院事。由撫軍副長岑春煊暫代行折。頃者兩粵川陝湘浙等省先後獨立。袁之大勢漸已失去。惟彼近仍竭力運動者。則一借美款。二求英保護是也。此外法人對我自來感情甚好。惟袁氏常使其心腹煽動於河內海防間。我軍於運輸事現在槍械等件尙難通過。此外各事均屬融洽。務望諸兄多方設法。破彼姦謀。聯絡感情。則目前之急務也。至一切詳情當另紙抄寄。餘則續詳專復。即頌學安不一。

## 復熊克武

錦帆仁兄英鑒。征途勞苦。正繫屢思。適接二月二十五號來函。欣慰無似。此次我軍入川。全賴執事仗義當前。以所集隊伍編爲游擊兩隊。協助梯團。又得兄贊畫其間。節節制勝。捷音屢至。益覺欽馳。現劉梯團長仍將游擊兩隊暨其他部伍移交貴部。



統帶已承允爲擔任。並組織爲護國招討軍名目。以規進取而固後方。計畫至爲周妥。名義尤極正大。即希照辦。此間內外安謐如常。所盼義麾所指。迅奏膚功。救濟元元。復我民國。斯則日夕所馨香頂祝者也。語短心長。不盡縷縷。專復。即頌助祺。並希心鑒不備。

致劉曉嵐

曉嵐仁兄偉鑒。違晤芝光。倏將半載。溯自義師出發以來。執事身任前鋒。摧堅克敵。每披露布。累日忻愉。嗣聞敵援日增。對壘措持。尤復不易。宣勞淹序。彌用神馳。近者桂浙諸省。相繼獨立。人心慕義。草偃風從。掃盪逆氛。指顧間事。然使非執事暨各校尉士兵等衝鋒陷陣。樹立先聲。曷克臻此。緬懷蓋績。嘉慰无已。滇省秩序安寧。臨箇偶煽匪氛。隨即殄滅。足紆綺注。溽暑應期。炎風拂旆。諸希珍衛。無任翹祝。專此佈。敬頌捷祺。

復陳維藩

維藩仁兄執事。軍書旁午。未得時聆教言。正勝歉念。迺承不棄。惠之手翰。錫以嘉謨。



幸甚幸甚袁氏夙抱野心厚自封殖苟所恃者未覆恐無決然引去之望然至今日外交財政軍事各方面均有迫之不得不退之象所謂以順攻逆勝敗昭然也袁氏果退則我完全之民國代理其職自有約法上之副總統在若欲就舉義各省先行召集國會選舉總統以俟袁氏之退不特事實上之窒礙孔多毋乃與約法相刺謬乎至倡義諸省應爲堅固一致之聯結自屬不易之論滇軍舉義以來凡有大事無不求各省之同意以進行粵西獨立以前彼此使命頻通謀而後動獨立以後緣電線被土匪破壞消息稍阻今且遣派行人前往接洽一切絕不至有所隔閡也鄙人德薄才疎極望海內英賢來滇贊助前此軍政各機關亦曾羅致黔蜀燕豫江浙湘贛諸名流相助爲理舉義以來益復分別延聘或駐滬港分任外界之職務或函電往來籌商大計特因交通不便一時未即到滇耳執事所聞或係傳聞失實惟既承見示當益加振勉期副盛懷辱承相愛故詳言之聞前國會各議員有赴滬組織代表會之舉閣下熱心蓬勃亦將首途聞之尤深佩仰切盼到滬將各問題解決後邀約諸碩彥聯袂來滇藉資擘畫無任翹企之至專覆敬頌籌安



覆彭程萬

程萬先生偉鑒。彥泳鴻名久矣。義旅初興。諸資擘畫。猥承屈就顧問。忻慰无似。袁氏竊國大局。阡危繼堯返。諸良知不敢居諸同志之後。率先倡義。擁護共和。成敗利鈍。非所敢計。來教獎勵逾恒。感媿感媿。承示擬舉兵江浙。奠定東南。以執事資望聲威。事必有濟。曷任企盼。就滇組織政府一節。勢須從緩。鄙意正與卓見相符。滬港同志。容即派代表往彼聯絡。此後鴻便。仍望隨時錫以教言。藉資啓迪爲幸。專此佈覆。祇頌偉安。

致許雋人

雋人先生大鑒。久欽山斗。良晤無由。雲海相望。彌殷企慕。比維政躬迪吉。聞譽增隆。爲頌。啓者袁氏謀逆。薄海同憤。滇軍倡義。勢不得已。區區苦心。當蒙鑒察。所幸前敵迭獲勝利。川湘方面。時報捷音。袁氏覆亡。可立而待。茲雲南高等檢察廳長王君准琛。由滇返閩。用特修函致候。藉問起居。一切詳情。詢之王君。當能洞悉。貴省近況如何。對於茲舉。諒無不表同情。惟旬日以來。未有若何舉動。想響應獨立。尙須稍待時



日乎。幸卽圖之。民國幸甚。專此敬頌勳祺。

會

覆李協和

澤 協和學兄偉鑒。大示折衷港函。條理井然。極爲佩慰。我軍對越方面。仍取雙方進行。一面宜擴張勢力。壓迫桂境軍威。一振彼必轉機。一面仍設法籠絡。促其發動。或勸令中立。以資聲援。至尊論對於港函主張各節。宏謀碩畫。自當遵辦。惟派交通專員。須以有外交才能者爲合格。一俟遴獲相當人員。卽委派前往岑西林任爲護國軍兩廣宣慰使。當叙狀寄港籌餉局。空白委任狀。亦卽飭局照發。又公債票。此間已擬定印交。續派籌餉員呂君携往。惟股票以兄名義發行。弟極贊成。吾兄信用資望。久爲華僑所共仰。登高一呼。當必得大宗款項。源源濟滇也。此覆。順頌俠安。諸冀爲國珍重。

下

覆耿毅

卷 敬覆者。頃展惠書。備悉種切。獎飾逾分。慚感交集。吾人此次倡義。亦不過聊盡天職。爲民請命。天相中國。或克殲此獨夫。重光漢土。前函懇請擔任駐滬代表事。俯承允



諾以先生才雄望重。仰藉鼎呂之言。定收聯絡之效。響應愈多。成功愈速。澄清甸禹。庶可預期。默念前途。尤殷企盼。亮疇。覺頓。行嚴。九峰。鎔西。諸君。近狀若何。如晤面時。請煩致意。爲之勸駕。此間同人。亟盼賁臨。專此順頌。俠安。統希亮察。

覆柏烈武

烈武先生偉鑒。前者兩奉手書。以未悉行旌所駐。遲未奉答。今接三月七日賜函。忻知安抵滬口。曷勝快慰。滇省僻處西南。此次勉襄義舉。差幸同仇者衆。獨夫已陷於困阨之途。惟欲盼大功之速成。最好於揚子江中下游一帶。速爲發動。否則曠日持久。不免重累商民。此則所北望而日夕禱祝者也。專此奉復。順頌盡安。伏祈照察。不盡。

其二

敬啓者。民國不幸。元首謀逆。庶政等治。絲而棼。四維幾掃。地以盡。誣民惑世。誤國喪權。繼堯等。慨念杌隳之邦。基冀仲鬱結之民。氣因與中原豪傑。併力圖謀。勉興撻伐。之師。期復太平之治。惟是首義區域。擔負特重。非厚集軍實。不克大振兵威。滇省士



氣發皇人心激奮義聲一播衆志成城現編護國三軍次第進發並設籌餉專局接濟軍需願集勇敢之邊民師已誓諸牧野而視貧瘠之山國慮莫切於量沙夙仰先生望重斗山義薄雲漢頻年碩畫羣推海內人豪登高一呼定傾南中觀聽用特專函奉推務請俯任南洋籌餉總代表就近籌措一切素謔僑南諸同胞愛國如命見義勇爲聞義旆之飛馳不少茲高捐乘得明公之勸募愈多卜式輸財繼堯等誓提雄師剗獨夫之專制載賡將伯望義舉之同襄專肅敬頌旅祺不佞

致殷鑄夫耿鶴生彭藹霄程頌雲

敬啓者共和建國於茲四稔昊天不弔降此鞠凶元首謀逆食言背誓凡有血氣莫不義憤填膺投袂而起蓋邦家當此杌隳之時何物袁氏竟敢帝制自爲窺竊神器既拂民情又召外侮大局前途岌岌可危此誠國法所不容神人所共憤繼堯忝列封圻擁護民國責無旁貸誠不忍以艱難締造之國家爲神奸所斷送是以首豎義旗爲民請命風聲所樹士卒騰歡目前提劍興師率滇中子弟編爲護國三軍期與中原豪傑會剪蚩尤重光八表夙仰先生義薄雲霄望隆山斗用特函請擔任軍府



駐滬代表酌審機宜。聯絡運動。接納賢俊。誓掃妖氛。異日恢復故物。克奏膚功。皆拜先生之賜也。專此肅候動祺。

致林森

子超先生執事。久耳令聞。未瞻雅度。渴懷之積。與日俱深。元奸竊國。繼堯祗。効前驅。共張撻伐。差幸順逆之勢。昭然成敗之局。已堪預測。惟軍行正亟。需餉至殷。雖南洋各埠僑商。與夫國內富豪。慕義解囊。源源輸助。而遐瞻前路。爲日方長。苟經濟不充。斯進行卽礙。竊念僑美同胞。夙多好義。急公關懷。祖國執事。又負當世之望。爲僑衆所心欽。爰擬請擔任爲護國軍政府美洲籌餉代表。務懇勸諭僑胞。踴躍輸將。共襄義舉。度執事熱忱愛國。決不憚此煩勞也。專函奉佈。惟祈照察。並祈爲國珍重。不盡。

致馮華甫

華甫上將軍戲下。疊致各電函。計當先後得達。典籤矣。袁氏叛國稱尊。人神共憤。滇効前驅。擁護共和。區區愚忱。當蒙鑒察。近因民軍迭獲勝利。廣西宣佈獨立。袁氏忱於人心已去。大勢所趨。無能爲力。乃始下令取消帝制。但帝制雖已取消。總統似猶



戀棧查國家根本問題。自以舊約法及大總統選舉法爲之根據。袁氏背叛民國。已喪失元首之資格。對內對外均已失其信用。豈能再爲人民代表。鄙意即宜依法。要請黎副總統繼位。一面召集各省代表。選舉合格之人。繼任副總統。若能就此解決。誠國家無窮之福。否則彼雖以大勢所迫。勉強取消。轉瞬則芟除異己。復萌故態。爾時國家危險將更甚於今日。繼堯一隅之見。未知當否。我公坐鎮江淮。翊贊共和。威望才猷。海內共仰。究竟如何主張。尙望神機早運。登高一呼。必能使四海景從。中外傾向。盛名偉業。舍公其誰。臨穎神馳。不盡縷縷。專肅敬頌。助安。惟照不備。

致柏烈武

烈武先生足下。舉師以來。迭承指示方略。傳達機宜。俾得洞悉敵情。藉收勝利。私衷欽感。莫可名言。只以聲罪致討。凡在國民責皆同一。况先生高義薄雲。更不當有所申謝。軍書旁午。未得時達。悃忱。王九齡君歸。始具述尊意。所指南洋各事。以先生之光明磊落。凡我國人無不知之。豈以此區區致疑及清聽。元惡未除。大難未已。願先生善自珍攝。道路之言。傳聞之語。既入世途。誰能免者。幸勿介意。期共努力前途。以



救國救民耳。惕生先生及各同志處。均不另及。統請先生代達微忱爲感。肅請旅安。諸惟心印不一。

致陳二庵

二庵先生大鑒。同人舉義情形。前由蔡松公電陳梗概。計達台覽。茲尙有未盡之懷。請再爲我公縷晰陳之。竊袁氏受職總統以來。歷時四稔矣。繼堯平昔對於袁氏。本極端擁護。其所以擁護袁氏者。實擁護民國耳。以爲吾國共和初建。袁氏繫蒼生重望。握最高政權。一切聽彼設施。必能徐圖興盛。與民更始。不意四年以來。凡百施爲。未愜衆望。加稅既重。累吾民。定約復喪失權利。內不能刷新庶政。外不能取信鄰邦。然猶不肯發難。輕於攻擊者。以大難屢遭。瘡痍可念。苟可補救。不妨徐徐圖之。我公歷年苦衷。諒亦同此。乃袁氏近復背誓食言。妄行帝制。卒召列強之干涉。加入協約之戰局。彼其意殆不惜以四萬萬生靈爲犧牲。五千年古國爲孤注。默念大局。岌岌可危。繼堯服務民國。歷有年所。擁護共和。本其職志。誠不忍以艱難締造之國家。爲神奸所斷送。激於天良之難忍。迫於大義之所在。乃率吾滇子弟。奉辭伐罪。惟我軍



欲得志於北。必先聯絡於西。滇蜀唇齒也。滇有事。不能不借助於蜀。以圖進取。亦猶蜀有事。不能不借助於滇。以爲後援。今者護國軍第一二梯團。已陸續抵叙矣。義師所至。羣謀響應。先生爲西南重鎮。民國干城。如能鼎力贊同。桴鼓相應。會與中原豪傑。殲此獨夫。挽既倒之狂瀾。維垂危之國命。永建共和。重光八表。則公之勛名。將與河山同壽矣。若意存觀望。甘爲袁氏所利用。則是服民國之官。食民國之祿。不爲民國圖報。直成民國之罪人而已。又或以爲先既贊成。茲難反對。則更大謬。前此之舉。誰不知爲利誘威脅。所謂民意推戴。實純由政府鑄造成之。即推公贊成。帝制之心。亦不過出於權宜。承旨抑或出於顧全大局。豈其心悅誠服。甘作貳臣。且爲公計。即令今日忠於袁氏。亦難善全終始。蓋袁氏爲人。狠鷙性成。前亦不少忠於袁氏之人。今竟何如者。以黎副總統。段芝泉。馮華甫。諸人之效忠。而莫不見疑。以梁任公。湯濟武。張季直。諸人之守正。而莫不遭忌。兔死狗烹。烏盡弓藏。古有明鑒。可爲寒心。況忠於一人。與忠於一國。孰得孰失。不辯自明。爲公爲私。顯然易見。想明達如公。當必有以自處矣。滇雲蜀水。馳系爲勞。時當嚴寒。諸希攝衛。敬頌決安。俾候明教。



覆陸幹卿

幹卿先生偉鑒。遙瞻嶺樹。正切依馳。適張瑩珊君來滇。接誦惠楸。並面述台教。如親覲紫芝眉宇。緜感无似。比維偉略。赫昭弗躬。頤豫定符。凡祝粵事。得我公及西林新會諸公。鼎力維持。柁險基危。安置一歸平安。從此東南聯絡。基礎鞏固。義軍得以專心一致。進搗逆巢。幹旋大局。所關至鉅。曷勝佩仰。所有奉商事件。已屬瑩珊面達。專此敬請台安。

其二

幹卿先生偉鑒。翹溯英威。恆殷馳仰。自貴省獨立以後。東粵浙江。繼踵而起。義聲所播。景合雲從。大局賴以幹旋。逆燄因之摧折。助猷彪炳。無任欽馳。敬懇者滇舉義師。迄於本年春杪。分攻川湘各路。以素號貧瘠之省。分攻戰至數月之久。大義所在。弟亦何敢不勉。爲其難。惟餉無來源。羅掘已罄。械尤缺乏。購自無從。使非停戰延期。實已無術支應。我公大局關懷。無分畛域。望與西林諸公。速籌接濟。俾收飽騰之效。而建策勝之功。曷勝盼禱。專此佈。凡敬頌勳安。



其三

會 幹卿仁兄都督麾下。自貴省宣布獨立。中外觀聽。爲之一傾。袁氏因有取消帝制之令。老成謀國。動定協宜。曷勝敬佩。近想籌畫。凡關於除奸去惡。及後此種種設備。早已與任公暨各執事。詳審商定。成竹在胸。措置裕如。指顧間事。顧滇桂一家。應行商討。請教之事甚夥。函電間或梗阻。消息卽爲不靈。茲特派本府林參議贊侯徐交涉員保權。趨詣崇階。敬候起居。并面致一切。祈賜接洽。此間情形。請俯詢該員等。便得詳悉也。肅箋奉佈。敬頌偉安。諸希爲國珍重。

其四

牘 幹卿都督麾下。敬啓者。貴省獨立。義聲震天。遐聽下風。距躍三百。當卽肅電馳賀。并請示協力進行事宜。嗣聞袁氏懾於義聲。宣布取消帝制。又本除惡務盡之意。瀝陳鄙見。電請尊裁。計已先後上塵清聽。竊維貴省及黔滇二省。此次共揭義旗。勢等輔車。誼猶唇齒。堯不敏。得追隨老成之後。共襄義舉。尤愜素懷。所有貴省軍事上之進行。亟盼方略時聞。俾知趨向。至帝制取消。逆揣吾國人苟安旦夕之心。恐不無受其



影響者。若我三省不預爲商榷。一致進行。慮終無以盪穢滌邪。而達擁護共和之初志。此則所以亟願承教於麾下者也。麾下忠誠爲國。識老思深。務祈不吝教言。匡其不逮。茲特派敝署諮議官張仁普。躬赴仁轅。面陳一是。并肅寸楮。順叩起居。於候裁示。即頌勳安。

致陳舜清

舜清仁兄麾下。危舟共濟。切仰盡籌。東望旌旗。神馳寤寐。惟以隨時爲國珍衛爲祝。貴省義舉以來。權奸喪魄。民國之幸。貴省之榮。惟元惡一日未除。卽我輩之責任。一日未盡。應如何協力以赴。共竟全功。深盼貴省諸公。示以機宜。俾資循率。比者交通時阻。函電多稽。用是特派敝處軍事參議林君贊侯。交涉員徐之琛。躬赴貴省。敬問麾下及幹卿都督任公先生。并諸同志起居。并請指示一切。敝處情形。亦由該員面陳。惟祈察照爲禱。專肅奉佈。敬頌勳祺。不宣。

復龍紫澄

紫澄都督惠鑒。粵海滇雲。睽違兩地。側聞勳望。時切欽遲。頃展手書。如親晤對。備承



藻注感愧蓬棕敬維蠶猷彪炳弗祉鴻申作砥柱於珠江壯節麾於柳壘歡聯袍澤  
誼重梓桑引望虬旌曷勝螳慕前次南防肇事崖略迭經電達堯德薄能鮮未足感  
人以致起此意外波瀾正深歉愧今迺不加責備轉荷謙冲雅量高懷無任企佩現  
已承派鄭江周諸君來滇同作調人勸諭黃恩錫等早日就範并由粵匯款以爲招  
撫遣散之資誼美恩明尤爲心折此間亦派黃顧問德潤同往宣慰一俟雙方消融  
之後所有發給護照等事自應如命辦理希釋遠系至於時局現得黎公依法繼任  
國家根本當可從此底定矣鱗鴻有便願聞教益祇頌勳祺

致龍怡庭陸幹卿

怡庭幹卿仁兄先生大鑒逕啓者袁氏食言背誓謀叛民國以致薄海撻心列強警  
告乃竟悍然不顧倒行逆施帝制自爲假託民意堯爲維持大局普順輿情起見不  
得不聲罪致討以伸大義於天下因於上年十二月宣告獨立興舉義師爲國效忠  
爲民請命初非有一毫權利之見存乎其間幸自起義以來滇黔合力分路出師於  
川於湘迭得捷報我第一軍之出川者已先後佔領叙瀘刻已進取成渝第三軍之



出湘者。刻已攻取晃州。直規辰沅。義檄初傳。威稜四播。諒執事聞之。當亦以手加額。同爲國家稱慶也。桂林象郡。砥柱共推。愛國熱忱。久深欽佩。切盼智珠密運。早樹風聲。袍澤同歌。用張撻伐。庶會師武漢。飲馬蘆溝。實惟閣下是望。卽希查閱。專此敬請。勳安。

致吳稚輝曾松翹

稚輝松翹仁兄先生惠鑒。久荷提携。未親丰采。每懷教益。無任欽遲。昨李委員宗黃回滇。具謠比來道履勝常。因時納福。欣慰曷似。并道先生主持清議。發揚義聲。媿注存於既往。益忠告於將來。厚意高情。稠疊周至。私心感激。匪言可宣。堯遠滯邊疆。無裨時局。去歲帝制發生。滇素貧瘠。竊不自量。從民舉義。爲天下先。追憶當時情勢。以一敵八。奚止鄒楚。且幹旋大局。全恃人心。引導輿論。又賴報章。所謂一言之重。一紙之力。勝於貔貅十萬。毛瑟三千也。又以滇處邊僻。遠隔中原。旣斷交通。益無聞見。現時大勢之趨附。人心之傾向。與此間士氣之勇敢。戰情之勝利。雙方均不得其真相。傳聞失實。觀聽易淆。所望以辨是非而伸曲直者。實惟先生與滬上諸公耳。乃派該



員就近接洽。卽承關垂逾恒指導一切。俾得諸臻順手。以有今日。顧念大局粗平。隱憂未已。政治之罪惡雖除。而人心之禍患尙無窮期。各省之秩序易復。而善後之辦法。何以推行。瞻望前途。實多危險。先生必有鴻謀偉畫。可以奠固國本者。尙冀時賜數行。以啓瞶聵。不勝企禱。專肅佈謝。卽請箸安。秋涼。諸維爲國爲時。珍重自愛。不盡欲言。

呈黎大總統

大總統鈞座。燕雲睽隔。瞻戀綦殷。八月二十九號。江少將雋到滇。奉誦諭書。注念殷拳。竝加寵飾。錫以九獅頭軍刀一柄。照像一張。登受之餘。榮感交集。伏念繼堯一介。胄之土耳其。忝領疆符。毫無稱述。擁護共和。亦職分之所當爲。迺蒙逾格垂慈。殷殷慰勞。視若股肱。親如手足。繼堯何德何能。而能堪此。惟有益矢慎勤。力圖報稱。以仰答隆施於萬一耳。國基初奠。叢脞萬幾。伏惟節勞。是企肅覆。恭叩崇安。

其二

大總統鈞座。敬肅者。竊繼堯遠隔。燿輝時殷。葵向瞻依。徒切報稱。未能伏惟功高再



造名滿寰瀛。燕雲引領。忻祝傾虔。茲有本省造幣廠長李祺因公赴京。晉謁崇階。傳聆鈞誨。伏念我大總統眷念西南。在遠不遺。用敢略貢芻言。聊當執贄。伏乞俯賜就見。滇中一切情形。俾得藉以陳述。專肅布札。敬請崇安。伏乞鈞鑒。

### 其三

大總統鈞座。敬肅者。繼堯以滇南末將。備荷注存。既錫之以寶刀。復重之以玉照。欽感下懷。業託江少將代爲轉陳。而燕雲遙企。瞻念無時。或已也。茲有本署顧問官日本法學博士今井嘉幸。在滇數月。持論明允。頗獲切磋之益。現該員辭職回國。擬順道漫遊京滬。並晉謁崇階。就聆鈞誨。伏念我大總統懷柔有素。延攬無遺。用敢略貢芻言。聊當執贄。伏乞俯賜垂詢。或能有裨。高深於萬一也。專肅敬請崇安。伏乞慈鑒。

### 致段芝泉

芝泉先生總理侍席。國基奠定。諸仗老成。引領樞機。曷禁怵舞。江君抵滇。奉展賜書。注念殷拳。感荷曷極。繼堯忝膺疆寄。無善足錄。義師之起。祇效前驅。獎藉溢辭。讀之顏汗。大局初定。建設方殷。提挈匡扶。仍惟總揆是賴耳。秋氣方涼。惟政躬節勞是企。



肅覆敬請勳安。伏希亮鑒。

致梁任公

任公先生侍席。功成身退。羨等臨淵。別遠思深。時縈夢殺。邇維興。居住佳勝。爲祝堯以。滇省善後。尙未就緒。不得不勉爲支持。至於大局建設。雖偶有所見。亦未敢漫然有所主張。先生成竹在胸。憂樂與共。尙乞撥冗。有以教之。幸甚。茲有本署顧問官日本法學博士今井嘉幸。在滇數月。議論持平。裨益甚多。現因辭職回國。擬便道漫遊京滬。並進謁台階。屬貢一言。爲之介紹。祈賜延納。或足爲高深之一助。滇中一切情形。亦藉可詢悉也。專佈敬頌道安。竝希愛鑒。

致李協和

協和仁兄軍長惠鑒。滇雲嶺樹。間阻以途。每企光儀。祇增嚮往。敬維景福。便蕃宏猷。彪炳瞻望。元戎曷勝臆頌。堯滇疆株。守塵積薪勞。所幸轄境粗安。秋成可望。差堪告慰耳。茲有本署顧問官日本法學博士今井嘉幸。敝省舉義後。因事到滇。旋以顧問名義。延入幕中。遇事諮詢。多所補益。現擬回國。順便游歷。取道越南。遵海北上。經過



港滬稍事勾留。素欽杓嶽。願踵膺門。冀伸仰止之忱。藉遂平生之願。又慮率爾掘衣。或鄰冒昧。特屬修函介紹。俾得晉謁台階。惟執事汲引人才。風流宏獎。倘荷進而賜教。顧盼增榮。喁感下風。不徒躬被。專肅敬頌勳祺。諸維亮察。不宣。

致日本中將三浦梧樓法學博士吉野作造

敬啓者。遠睽帶水。未接音塵。側聽風猷。彌殷嚮往。敬維蓬瀛養望。戟第安居。翹首臨風。傾心積日。堯謬領邊圻。無補時局。去歲帝制發生。滇素貧瘠。竊不自量。舉義從民。幸承借助他山。多所匡益。得以擁護共和。漸定大局。私衷感激。匪言可宣。惟是敝國操莽雖除。汜催復肆。前波後浪。此蹶彼興。顧瞻前途。杞憂曷已。茲以敝省講武校長吳和宣君。游學貴國。囑渠晉謁台階。代伸忱悃。尚乞進而教之。且滇處邊僻。聞見較遲。并望時賜箴益。藉啓蓬衷。尤所企禱。濡毫攄悃。不盡區區。專肅并謝。順頌時祺。不具。

覆譚組菴

組菴先生節下。昨江浴岷專使抵滇。接奉賜書。并宙密電本。一一領悉。知前託鎔西



代呈一函。拳致欵曲。已達典籤。欣諭重承簡命。建節梓鄉。作南服之屏藩。起東山之霖雨。新猷克壯。令望咸孚。堯自去歲舉義以來。負弩前驅。爲民請命。自顧薄弱。深懼弗勝。相持半年。幸承天眷。共和恢復。大局漸定。羣公之力。諸將之功。堯何有焉。乃蒙獎借。愧何敢當。惟是操莽雖除。汜懼復肆。內憂外患。來日大難。先生以鑄造民國之偉人。居縮穀交通之要地。團結渙散。扶濟危傾。環顧國中。非公莫屬。滇處邊遠。聞見較遲。堯雖不才。責任所在。不敢不勉。既托同心。許相提挈。以後擬隨事承教。就電相商。尙冀時錫南針。俾有遵循。不致隕越。是所企禱。不盡欲言。專此敬覆。即頌勳祺。諸惟惠鑒不具。





雜

文



誓師文

維中華民國五年正月朔日。繼堯謹以犧牲酒醴。昭告皇天后土。而誓於師曰。嗚呼。民貴君輕。萬邦是式。賊人殘義。一夫可誅。矧國是之久成。何逆謀之可宥。魯連蹈海。尙恥帝秦。管寧適遼。不甘臣魏。其有國步方難。羣情望治。遂乃妄侈邊幅。效井底之鳴蛙。夷我華宗。戴塚中之枯骨者哉。粵自武昌首義。中土雲從。五族一家。億姓同德。掃除專制。創建共和。應世界之文明。爲友邦所承認。乃者。袁逆世凱。謀叛民國。復興帝制。黃屋大纛。遽興非分之思。礪河帶山。無復未寒之約。移鐘簾於反掌。家天下局勢已成。輸歲幣以尋盟。小朝廷面目安在。亟子孫萬世之私計。誤國家百年之遠圖。本都督服役民國。作鎮滇疆。痛國家之將沉。恨獨夫之不翦。爰整義旅。恭行天罰。擊祖逖渡江之楫。誓清中原。問新莽指斗之杓。能持幾日。嗟爾有衆。尙其弼予。嗚呼。爾惟克奮厥武實。乃無疆之麻。予亦允報汝功。永有不次之賚。嗟爾有衆。尙欽念哉。

誓告全國同胞文

中華民國雲南都督唐繼堯謹誓告於我全國同胞公鑒。袁爲不道。竊號自娛。言念



國危有如朝露。堯等不忍神明之胄。遞降輿臺。更懼文教之邦。永淪歷劫。是用憤發。力任驅除。首事不過兼旬。風聲已播全國。具見時日之痛。悉本於人心。差幸疾風之節。猶光於天壤。惟是棖崩棟折。詎一木之能支。定傾扶危。將羣材之是賴。堯等回天。力弱返日。心長不惜。執挺效撻。伐之先所冀。鼓桴有聲。應之助乃如黨。分洛蜀。疑有異同。地判越秦。不無歧視。或謂伯符有坐大江東之勢。抑恐敬業存覬覦金陵之心。凡此疑似之辭。慮不免於讒間之口。竊爲是懼。用敢披瀝肝胆。謹布誓詞。以告國人。並自申警。(一)同人職責。惟在討袁。天祚吾民。幸克有濟。舉凡建設之事。當讓賢能以明初志。箇人權利思想。悉予剷除。(一)地無分南北。省無論甲乙。同此領土。同是國民。惟當量材程功。通力合作。決不參以地域觀念。自啓紛裂。(一)倒袁救國。心理大同。但能助我。張目便當。引爲同志。所有從前黨派意見。當然消融。絕無偏倚。(一)五大民族。同此共和。袁氏得罪。民國已成。五族公敵。萬衆一心。更無何等種族界限。茲四義者。誓當奉以周旋。苟此志之或渝。即明神所必殛。皇天后土。實式憑之。惟我邦人諸友。鑒此心期。或仗策以相從。亦劍履之遽及其諸同仇。可賦必有四方豪傑之來。衆志



成。城。不。墜。二。相。共。和。之。政。謹。告。

慰勞護國第一二三軍及挺進軍文

天禍我國元首謀逆。我將士有衆。與余同心。不忍使天下淪於禽獸。遠道出征。宣威遐邇。期以北平大憝。保我民國。我聞人言曰。司令善治軍。軍服司令。又曰。滇軍至仁。以至仁。伐至不仁。軍必有功。余嘉乃勛。用遣將校往撫有衆。遵司令之命。丕揚無疆之麻。今天暑漸炎。師行日遠。余遙祝健康。不啻執鞭弭。以隨我有衆之左右。冀天悔禍。速告成功。我民國萬年。實永賴之。罔有攸斃。

慰勞劉總司令積之所部軍隊文

天禍我國元首謀逆。天下節義廉隅之士。罔弗痛心疾首。思執干戈。以衛國家。維我劉總司令。首與余契。治兵除凶。用勞我軍士有衆。選車徒。蒐乘馬。簡器械。先驅殺敵。以克有功。我聞人言曰。總司令善治兵。兵服總司令。寧忍飢。不奪民食。寧忍凍。不衣民衣。寧露宿。不侵民居。交易不擾市。踰境不擾耕。嘉乃勛。保乃譽。告厥成功。惟汝是賴。古我先聖文王。視民如傷。亦越孫武。吳起。拊循士卒。有逾骨肉。余遠居一方。不獲



會澤文龍下卷

躬拊有衆。謹使李君華英代余行。致余忱慰。我軍士有衆。尙克保閭閻。安父老。遵總司令之命。揚總司令之威。用盡除我民國之敵。我民國萬年實永賴之。罔有攸替。

## 慰勞南防各軍將校兵士文

繼堯與吾滇父老子弟相周旋已三年於茲矣。安居樂業。方冀長享共和幸福。不期天禍中國。元首謀逆。義師之興。良非得已。我父老子弟咸延頸跂踵。願早觀厥成功。所幸大師北伐黔桂粵浙次第響應。川湘勘定。功成旦夕。乃有不逞之徒。擾我南防。重勞我將校兵士。跋履山川。以勦以撫。彌月以來。所向底平。繼堯既恐我父老子弟之晨夕驚悞。又念我將校士兵之風霜勞苦。中夜旁皇。不知所措。祇以職守綦重。不克躬赴戰地。拊循我軍人。爲我父老子弟之保障。特遣將校代繼堯之行。達我誠意。我軍人作我股肱。寄我心膂。嘉乃勛保。乃譽嚴以治匪。寬以撫民。明以赦脅。從迅奏全功。民國萬年維爾攸賴。允若茲俾我父老子弟田爾田宅。爾宅居不擾。市行不擾。耕方今農時。播種生計日艱。我軍人桑梓情深。尤願加意保護。毋驚一人。毋傷一物。多盡爾一分之心。即減我一分之痛。勛哉將校。勛哉兵士。實萬世無疆之庥。



慰勞護國黔軍文

曩者、余治黔軍。嚴紀律。共甘苦。勤訓練。屏藩南服。親若手足。今以元首謀逆。不得已。勞我將士。馨罪致討。軍出湘南。宣威萬里。逆首震懼。實爲我黔軍之功。余嘉乃勳。恤乃勞。用遣將校。往拊有衆。若余躬行。天佑下民。我有衆。伐罪弔民。民安厥居。師克成功。底定有日。我民國世。永賴之實。惟我有衆之賜。滇黔如一體。余與有衆。如一身。敷余心腹。勞余手足。天道助順。丕揚無疆之庥。我有衆。尙其勗哉。

祭蔡松坡先生文

衡嶽摩空七十二峰。產陸離之茵芝。挺千尋之喬松。當天地之變化。遂降神而生公。金百鍊以彌赤河。萬折其必東。胡爲罔克。厥壽罹此鞠誦。若火始然而薪盡。若泉始達而源封。彼扶杖白叟。垂髻黃童之仰望。英風者莫不惻惻而忡忡。而况袍澤裳同。平昔游從。用肇造我區夏。兩人一心。成大功者哉。庚辛之間。勢趨改革。公協滇鎮。視我莫逆。武漢一呼。三軍動色。公乃提挈同盟。籌畫重陽。功成雁飛。月黑。我專北伐。假道於黔。蝸蟻沸羹。擾逮閩閩。勒兵定之。牂牁安恬。黔苦瘠磽。惟滇仰瞻。公挹以注。不



客續縑功德是荷。滇黔寶兼。公之去滇。我繼公秩。蕭規曹隨。守之勿失。於今三年。幸勿隕越。人言蔡唐。顛若畫一元首。殆而帝制自爲。卓犖羣雄。望風而雌。我公出走。死生以之間。關跋涉。告我顛隳。乃戒我旅。乃整我師。公行我居。前驅入川。歲十二月。風雪漫天。辛苦千萬。爲士卒先。一鼓作氣。叙州克焉。納溪報捷。瀘州進戰。蜀江瀾翻。風雲色變。或摧其堅。或乘其便。師直爲壯。走霆飛電。其或敗奔。公爲之殿。北風剛勁。懾我滇軍。僉曰。強哉。如日本人。血流成澤。原隰朱殷。黔桂粵浙。響應斯臻。義氣撥雲。獨夫驚魂。帝制消除。下令罪己。羣起而爭。退位乃已。愧恨不任。其類有泚。將何以視。天地於五月六日。自恨死天柱。將傾協力。以擎乾旋。坤轉勞勩。曷勝。遂辭川督。養疴東瀛。方期无妄之疾。勿藥有喜。如何昊天。不弔宵隕。大星嗚呼。松坡可悲。可歌率曳。落河揮魯陽。戈日空牛蛇。手斫蛟鼉。其如病在骨髓。雖司令無如之。何事勢大難在彼。來日吾後死者。戰戰慄慄。哲人萎乎。噫其喪予。皇穹不鑒。高高難呼。永訣千秋。承凶萬里。浩浩陰陽。於邑何已。嗟公之歸。無再來期。望風奠罍。涕泗漣洏。嗚呼哀哉。尙饗。

祭黃克強先生文



年月日繼堯謹以不腆之儀致祭於黃克強之靈曰嗚呼我公革命之靈曰嗚呼我公革命之雄生丁亂世抗想大同出入生死馳驟橫縱神州陸沉乾坤否塞中山人豪首倡改革公本健者相視莫逆奔走海外履險頻艱河口之戰震動越滇大舉不成作始綦難辛亥之春志士齊赴再圖廣州圍攻督署七十二人溘焉朝露請命淪胥大勢所趨武漢一呼公與之俱電掃風驅金陵姑蘇癸丑之役甯非見逼事敗出亡毀譽弗惜袁氏稱帝昭昭曲直共和四載帝制復萌舉國如醉莫之敢撓滇軍舉義公亦同盟方期携手重顯世則奠國金湯登民衽席同我太平永永無極日月往還急於跳丸海天蒼茫蹉跎山川秋風淅淅悲以易歡感公之志堅苦卓絕悲公之遇顛沛屯蹶惜公之才猶未發越國喪雋望悲豈一人敬奠撫棺將意春申萬里滇雲爲賦招魂尙饗

祭南防陣亡各將士文

維中華民國五年陽歷十一月十五日雲南督軍兼省長唐繼堯率軍政紳商學各界全體用牲潔酒致祭於南防各屬護國軍陣亡將校士兵之靈而告曰嗚呼上年袁逆帝制自爲大拂民意搖動國基我滇舉義命將出師所向克捷大局維持一心



擁護濟變扶危。詎知小醜。利用此時。乘機煽亂。擾及南陲。流毒臨箇。肆虐邱彌。蹂躪桑梓。滿目瘡痍。得我武士。致力馳驅。奮身不顧。勇邁熊羆。衝鋒陷陣。拔幟。舉旗。英光浩氣。轟烈男兒。豹皮不朽。馬革堪悲。寒風蕭瑟。畫角淒其。首邱歸正。哭奠靈祠。忠魂藉慰。名著昆池。嗚呼。尙饗。

祭擁護共和陣亡各官兵文

維中華民國五年十二月二十三日。爲吾滇舉義周年紀念大會之期。雲南督軍兼代省長唐繼堯。率軍政學紳商各界全體。用牲潔酒。致祭於

忠烈祠 擁護共和

陣亡各官兵之靈。而告曰。上年袁逆。僭號稱帝。行同莽卓。窺竊神器。搖動國基。大拂民意。惟我滇南。出師舉義。分道川湘。披堅執銳。所向克捷。風雲壯氣。大局維持。河山帶礪。還我共和。忽已周歲。言念軍人。驅馳戰地。奮不顧身。致命遂志。毅魄英魂。實增榮譽。醞酒靈祠。沾襟有淚。世界太平。庶其藉慰。尙饗。

賀大總統壽文

中華民國五年十月十九日。恭逢黎大總統攬揆之辰。繼堯謹設壽壇。率全省文武



官吏同行慶祝。爰爲之頌。曰共和再造。元首當陽。靈鍾漢水。德媿陶唐。釐斟菊。進霞觴。宏開壽域。大啓明堂。普天同慶。率土膺颺。回思昨歲。帝孽猖狂。滇南舉義。擁護中央。誓師討逆。分道川湘。黔桂響應。粵浙相望。帷籌勝算。氣攝八方。永除專制。民意伸張。還我故物。日月重光。黃陂繼任。遐邇軒鬢。勻調玉燭。鞏固金湯。太和翔洽。喜起明良。昇平景象。漢道永昌。欣逢攬揆。曲奏鸞凰。一人有慶。海波不揚。書陝洪範。詩詠無疆。亞歐效順。金碧呈祥。同登衽席。共樂梯航。三宣鼓舞。六詔趨跄。桓桓師旅。濟濟冠裳。燕巒北望。慶祝康強。河山並壽。寶籙綿長。

祝黎大總統就任詞

惟彼袁氏。叛國奸雄。妄行帝制。窮極惡凶。天人共憤。致肇兵戎。滇省倡義。爲國效忠。黔桂粵浙。先後贊同。謹遵國憲。推戴黎公。公之威望。震鑠寰中。公之勳業。應比華嵩。創造民國。公之首功。擁護共和。公之苦衷。兆民永賴。天下從風。維茲國祚。永世無窮。謹率軍政學商各界。拜手稽首。揚言曰。中華民國萬歲。中華民國大總統萬歲。

國慶紀念祝詞



中華民國五年十月十日。恭逢國慶紀念。雲南督軍兼代省長唐繼堯率全省軍政紳商學各界同仲慶祝。爰爲之詞曰。民國建設於今五年。追溯武漢。倡義幹旋。共和五族同戴。一天驅除暴政。大張民權。步武歐美。繼軌羲軒。歡聯中外。絕後空前。亦越四載。繼序罔愆。元首背叛。帝制自專。化國爲家。以遺子孫。神人共憤。萬國具瞻。爰伸大義。誓清中原。率滇健兒。直搗幽燕。登高一呼。響應三邊。天相民國。獨夫不延。河山再造。氣象萬千。江漢勳留。金碧輝連。永祝福利。長此緜緜。

滇省首義週年紀念祝詞

中華民國五年十二月二十五日。爲吾滇興師討袁。擁護共和。週年紀念大會之期。雲南督軍兼代省長唐繼堯率全省軍政紳商學各界同申慶祝。爰爲之詞曰。溯自上年袁逆不道。帝制自爲。行同莽操。搖我國基。洪憲僭號。會設籌安。海內紛擾。輿論譁然。友邦訕笑。惟我滇南。地處邊徼。霹靂一聲。出師致討。仗義執言。馬騰士飽。諸將荷戈。川湘直搗。十萬橫磨。五千迅掃。疊奏凱歌。交馳捷報。響應黔中。繼起嶺表。象同心。靈鷲奮爪。大局挽回。全球熙皞。專制剷除。共和再造。擁護國家。民情順效。



武文修明政。教樽俎聯歡。箕畢協好。歷史光榮。羣倫斧藻。今屆歲周。摛詞頌禱。松菁蔥旌旗焜燿。金碧增輝。蒼赤舞蹈。祝我中華。河山永保。

元旦祝詞

中華民國六年正月一日。欣逢元旦。爰爲之祝曰。共和再造。歲序更新。懲前毖後。圖治勵精。凡我百僚。共振精神。整軍經武。發政施仁。通中達外。利國福民。金湯永固。帶礪長銘。三宣六詔。共祝恒春。

北京民國方報祝詞

共和再造。復我邦家。伸張正論。筆燦雲霞。休明鼓吹。蔚爲國華。都門北望。頌禱無涯。北京覺報祝詞

天相中國。鞏固共和。民皆安堵。海不揚波。重光日月。載戢干戈。修明政教。帶礪山河。遙維覺報。墨舞筆歌。主持正論。不偏不頗。京師首善。仁漸義摩。風行宇內。相與切磋。北京英文京報社祝詞

天相中華。共和再造。河海澄清。星雲焜燿。民意將伸。國會復召。選賢進才。經邦論道。



圖治維勤。建言有要。宏濟艱難。聿新政教。舉世雍熙。羣情舞蹈。鼓吹休明。允符頌禱。

上海中華新報祝詞

共和復建。言論自由。報紙風行。速於置郵。大報開幕。已屆一週。發揚義聲。喚醒神州。再造民國。砥柱中流。一紙代價。十萬貔貅。紀念臘歡。無間遐陬。敬祝斯報。萬歲千秋。

義聲報館出版週年紀念祝詞

去年今日。爲吾滇擁護共和舉義之期。幾經險阻艱難。乃將此莊嚴燿燦之中華民國。鞏固厥基。是義聲之振振有詞也。而亦足以永增我金碧之光輝。

雲南中華新報社祝詞

共和復建。言論自由。報紙風行。速於置郵。大報開幕。紀念一週。發揚義聲。喚醒神州。再造民國。砥柱中流。一紙代價。十萬貔貅。推行全國。無間遐陬。滇南首義。觀聽所收。別開新館。以應其求。發抒讜論。啓沃嘉謀。指導輿論。式煥新猷。勿爲黨同一楚衆。咻勿伐異己。以盾刺矛。如設慈航。共濟同舟。如宣木鐸。徇路有適。振聳之鐘。采風之輶。敬祝斯報。力爭上游。與民更始。與國同休。一日千里。萬歲千秋。







民國六年六月印刷初版

會澤文牘下卷

定價 角

南都督府秘書廳

開智公司

發行 雲南圖書館

分售處